

東
華
續
錄

東華續錄

同治二十七

臣王先謙敬編

臣張式恭恭校

冬十月乙亥諭內閣閻敬銘奏東省漸次肅清懇請回籍終制一摺閻敬銘以丁憂臬司破格奪情擢膺疆寄原因山東省軍務吏治皆須力加整頓而閻敬銘平日辦事樸誠是以特資倚畀該署撫受此不次特恩宜如何激發天良力圖報稱見在淄川鄒嶧各匪及東昌府屬降匪雖經僧格林沁督兵剿洗次第殲除而宋逆在逃餘匪未靖疊經諭令該署撫督屬接捕務絕根株況東省吏治頽靡尤宜及時振作以挽積習一切應辦事宜均關緊要遽請終喪迹則本於守經意實近於諉卸且該署撫於到省後瀝陳兵團積弊謂宜認真整飭並有一事未善卽一日不敢偷安之語該

署撫任事半年捫心自問所整飭者果何事耶乃因賊匪稍靖輒稱四境已清軍旅已息故作粉飾之詞冀遂卸肩之計大失朝廷倚任之意閭敬銘著傳旨申飭所請開缺終制之處著不准行○諭議政王軍機大臣等僧格林沁劉長佑奏追剿朱登豐股匪全數擒獲正法一招逆匪朱登豐等均係屢降屢叛之賊此次被剿窮蹙詐降經官軍合圍剿捕全數擒獲正法其在逃之程敬書張廣德二犯著劉長佑嚴飭地方官實力接捕毋任倖逃法網見在直東境內雖無成股賊蹤惟逆首尙未全獲大名河間一帶伏莽尙多難保不因僧格林沁大軍赴豫餘燼復燃僧格林沁在大名與劉長佑會晤自必將一切未盡事宜告知該督著卽責成劉長佑督飭文武員弁及地方官吏認真搜剔務絕根株經此次諄諄訓誡之後儻在事各員並不實力奉行致餘匪復相煽惑滋事重

煩兵力惟劉長佑是問懷之將此由五百里各諭令知之○富明
阿奏臣撥兵援蒙已進紫長淮衛擬卽攻懷遠以分圍蒙賊勢查
苗沛霖併力蒙城黨與雖多亦非盡甘心從逆經臣與唐訓方妥
爲遣散出示招撫旋據練董江蘇候補知府田端書稟稱接據被
脅練總張大儒等函稱九月十五日約同淮河兩岸民圩將苗逆
糧臺焚毀並將管糧之金姓殺斃見已集有二萬餘人卽攻下蔡
且有李世功內應已在石頭埠截留苗逆糧船百餘號等情其遠
近各圩願投誠者甚多當經臣札飭該練總等迅集圩團攻克下
蔡斷賊糧道仍一面先其所急將由揚來援之四千人調赴蒙城
以都統克蒙額所帶馬隊一百餘人作爲嚮導已於九月二十一
日飭翼長詹啟綸等拔隊陸續啟行臣於二十五日督師前進惟
前軍一撤恐賊乘虛思逞投誠各圩又失所望當飭王才秀所部

一千四百人仍紮蚌埠前敵並咨商唐訓方撥兵填紮後路李世忠援臨之軍已有萬人如下蔡得手正可乘勢進攻應請旨飭下李世忠迅卽分兵攻取苗逆老巢蔣凝學等軍恢復壽州唐訓方進圖懷遠臣卽由蒙城督同陳國瑞等軍力解蒙圍相機進取

上諭直東股匪節經僧格林沁督師接剿殲擒殆盡其在逃之宋逆及零星餘匪疊諭劉長佑等嚴密拏辦諒不難悉數弋獲僧格林沁見由延津渡河赴豫剿擒此時豫擒竄擾何處未據張之萬飛章入告僧格林沁入豫後察看賊氛如情形並不甚重卽當由歸德一路進兵先拯蒙城之急昨據吳棠奏接准侍郎國瑞函稱以直東軍務肅清鄒縣兵馬整齊擬由韓莊取道徐州南征苗逆等語鳳凰山附近地方有無餘匪潛匿如無須國瑞駐師鎮壓卽著飭令該侍郎迅由徐宿一帶前進俾附逆各圩咸知僧格林沁

大兵將到各思投誠效順則苗逆之勢漸孤剿辦自易得手況被脅練圩非盡甘心從逆疊據富明阿唐訓方奏遵旨出示招撫見有練董田端書張大儒等將苗逆糧臺焚毀聚集二萬餘人圖攻下蔡若乘此機會懸以重賞予以優獎而以勁旅繼其後提挈而鼓舞之則各圩之反正者必多而蒙城之圍可期立解並著僧格林沁迅速籌辦富明阿見已馳赴蒙城兵力漸厚著再申明前諭督飭陳國瑞等併力進攻或分兵赴全家集扼紮渦河上游截賊糧運以牽制賊勢均著富明阿相機妥辦惟富明阿拔營後新撫各圩未免失望必得大軍鎮撫方足以維繫人心王才秀蚌埠一軍尙嫌單薄著唐訓方添撥兵勇前赴長淮衛等處駐紮以壯聲勢李世忠援臨之軍已有萬人該提督既係力圖報效即可借資其力並著曾國藩乘機利導飭令分攻苗逆老巢檄調蔣凝學規

取壽州唐訓方亦卽率師進圖懷遠務期四面兜剿使該逆首尾不能相顧自不難擒穴擒渠切不可彼此觀望予賊以可乘之隙致有貽誤陳大濬股匪由隨州竄近黃州勢將闌入皖境曾國藩仍當抽調得力將領會同鄂軍前截後追以收夾擊之效毋稍大意曾國藩另片奏請畱道員黃冕經理江楚海運及籌辦米鹽互市事宜等語黃冕著暫緩赴粵准其畱於蘇皖聽候曾國藩差委該道員曾任江蘇知縣聲名狼藉頗不理於眾口此次曾國藩飭令經理海運等事不過節取其長以供驅策仍當隨時畱心秉公察覈如黃冕故態復萌卽當據實嚴參毋得以奏畱在前稍涉瞻徇將此由六百里各諭令知之○丙子諭議政王軍機大臣等張之萬奏捻匪由魯山南召南趨剿擊獲勝並攻破王寨請畱善慶暨黑龍江餘丁察哈爾馬匹各摺片張總愚股匪由登封汝州竄

入魯山縣境經官軍追至該縣之大營集進勦獲勝賊復竄撲南
召縣城爲守城兵練擊退並經張曜督軍追及於城南十里鋪續
獲勝仗該匪遁至口字河迤南扼拒山口未能搶入此股捻匪人
數眾多見被偏勦南趨勢必西竄商維南窺宛楚該處係三省扼
要之區山嶺叢雜且與鎮平內鄉接壤偏近武關爲多隆阿大營
轉運軍火之路亟應加意嚴防張之萬務當督飭張曜派撥勁旅
嚴扼鎮平內鄉交界險要勿令西窺陝境仍督率永奎王文行等
各隊與張曜所部就南召山內四面圍勦勿令他竄並知照楚軍
迎頭會剿以期迅掃逆氛陝南與安一帶徧地賊蹤儻被此股捻
匪竄入勾結蔓延益難收拾著劉蓉張集馨督飭商維文武各員
鼓勵兵團嚴密堵截一面知照李雲麟就近防剿並著多隆阿籌
撥兵勇扼守武關毋令該匪闖入腹地至襄樊隨東一帶爲捻匪

由豫竄楚熟徑著官文嚴樹森迅飭在防將士扼要固守勿令擾近邊界僧格林沁見已督兵由大名前赴豫省儻此股捻匪因陝楚兩路防堵嚴密折回東竄卽著迎頭截擊痛加殲戮以殄狂氛至豫省正息各境伏莽未清雖經總兵李殿元將匪擊散截殺百餘名平毀寨牆而逆首並未就獲仍慮餘燼復燃著張之萬督飭李殿元並該地方文武迅將張正渭等首夥各賊悉數殲除毋畱餘孽薩薩布已由歸德馳赴臨淮卽著唐訓方飭令管帶馬隊聽候調撥見在豫省賊勢鴟張官軍馬隊統帶乏人善慶適帶黑龍江餘丁行抵豫境著照該撫所請准其畱於豫省並將撥往臨淮之黑龍江餘丁五百名察哈爾馬一千匹一併畱豫歸善慶統帶以資防剿再本日據李鴻章奏到劉長佑派赴上海招募楚勇之參將吳永敖已由李鴻章撥給銀三千兩由滬渡江順途招集楚

勇馳回館陶此項楚勇能否畱於豫省助剿之處已諭令劉長佑酌量辦理矣將此由六百里諭知僧格林沁官文嚴樹森多隆阿劉蓉張之萬唐訓方並傳諭張集馨知之○諭前因直東防剿喫緊經劉長佑派委參將吳永敖馳赴上海招募楚軍一千名茲據李鴻章奏稱另在洋稅項下動撥銀三千兩交吳永敖支領由滬渡江順途招集楚勇馳回館陶大營助剿等語見在楊澥一朱登豐等股匪節經官軍追剿殲除其未獲逆首程敬書等及零星餘匪昨經諭令劉長佑嚴飭地方官實力接拏諒不難剋期蕪事且李明惠等兵勇前已諭令仍回直隸歸劉長佑調遣似兵力亦已敷用豫省捻蹤肆擾兵力甚單防剿諸形喫緊此項新募楚勇如非直隸軍營所必需即可由該督咨行張之萬撥赴河南助剿捻匪著劉長佑酌度情形奏明辦理將此由六百里諭令知之○李

鴻章奏程學啟一軍攻克寶帶橋後商同李朝斌戈登分投堵剿
寶帶橋西有五龍橋爲蘇州入太湖之鎖鑰該處賊紮堅壘六座
憑河死守九月十二日程學啟飭周良才等嚴守永安橋老營親
率五營並洋槍隊二千人及水師陳東友成愈卿等由寶帶橋分
路進攻五龍橋逆壘戈登以開花大礮攻其左轟傷垛賊多名賊
猶抵死不退李朝斌由左首小河繞出賊後用礮轟擊賊旗已亂
成愈卿陳東友乘勢蹙之戈登帶隊緣牆而上陳忠德等撲入賊
營之右立破大營兩座土營四座追斬潰賊鮮得脫者暮逆突由
盤門擁眾來援經張遇春等擊退計是役擒賊四百餘名傷斃千
餘落水死者無算其嘉湖窰撲吳江同里之賊經知州吳毓芬參
將何安泰等於初六初八初九初十等日敗於長板橋等處而百
龍橋八坼一帶賊營密布直至平望程學啟令戈登暫駐五龍橋

十五日自督水陸各軍從吳江分路進擊戈登派洋人克根本等分帶礮位出隊助剿各破沿途賊營十餘座進至八圻諸軍會合夾攻生擒偽貴王陳得勝及悍賊一千餘名斬殺三千餘名其破賊營三十餘座追至平望賊匪望風奔潰訊據擒賊供稱偽會王榮王貴王帶賊三萬餘人逃出者不及一半臣查官軍進攻蘇州紮永安橋而婁門路斷紮寶帶橋而葑門路斷茲攻克五龍橋而盤門太湖之路又斷蘇逆遂句通浙逆圖撲吳江以擾我後經程學啟與戈登李朝斌協力迎剿幾使嘉湖援賊片甲不歸從此攻蘇之軍不虞牽掣臣飭程學啟調陳有昇梁安邦二營扼紮五龍橋張遇春二營扼紮寶帶橋鄭國魁二營移守同里之長生橋均派太湖水師分駐依護仍令程學啟戈登督帶槍礮隊伍四路游擊隨時會商李鶴章等先將援賊擊退再行設法攻城惟分布太

廣兵力過單必須穩慎籌辦以固全局又奏忠逆自大橋角敗退糾集大股賊匪八九萬眾船千餘隻停泊運河口令各僞王由望亭后宅滾營前進圖竄常熟鈔我後路九月初四日郭松林督率馬步剿賊於茅塘奮勇衝殺擒斬多名賊始退回滕嗣武張樹珊等亦於是日擊退蘇舍橋一帶之賊初八日李鶴章親督各軍進至后宅忠逆率黨出拒我軍排放槍礮直奪其卡滕嗣武合力追逐賊遁入營其街北一營最堅街西賊營無數皆倚河爲壘滕嗣武張樹珊先攻街北賊營賊伏不動營後賊眾數萬突出猛撲我軍轉至街西大橋整隊鏖戰斃賊數千名李鶴章督催橋東大隊踰街衝突賊始敗退李鶴章遂畱滕嗣武三營併紮大橋角令張樹珊帶隊回張涇橋老營豫備夾擊初九十一等日郭松林率隊屢敗賊於紅山等處十三日忠逆率大股由后宅竄撲安鎮郭松

林復擊走之。擒斬頗眾。江陰西南焦塾芙蓉圩等處爲僞護王賊眾踞守。日在江陰城西擄掠。並以斜橋三河口築壘十餘座。劉銘傳進駐青陽。於九月初二日先攻芙蓉圩之賊。破其外卡。搭橋渡河。圩賊萬餘分路來撲。劉銘傳令彭楚文守護浮橋。劉盛藻等從兩邊圩埂迎擊。劉東堂由圩心迎擊。水深數尺。各勇解衣酣戰。賊遂大敗。護逆以木板浮河逸去。斬僞天將馬逆一名。擒僞官五百餘人。芙蓉圩等處卡館一律掃清。初三初五等日。唐殿魁等進剿焦塾之賊。劉銘傳自率五營繞攻焦塾。之後。劉盛藻奪石巖山河口賊卡二處。張桂芳敗西路援賊各軍。分攻河東南北三面。賊營擒殺踞賊二千餘名。立將焦塾賊營踏毀。乘勝攻踏三河口賊營十餘座。十一二等日。各營迎剿侍逆大股。又破賊眾於西高山聯營。進剿侍逆。退踞高橋。臣查忠侍各逆全勢萃於西路。力援無錫。

以護蘇州援賊一日不清則蘇錫不能進取護逆一股受創已深
侍逆亦爲劉銘傳等擊敗退踞高橋其鋒稍挫我軍可以專意併
圖忠逆臣見飭李鶴章與劉銘傳郭松林張樹聲等堅紮營濠以
固後路抽派精銳直逼賊壘合力進攻總須擊退忠逆錫蘇各城
乃可漸圖 上諭五龍橋爲蘇州下太湖之鎖鑰該逆憑河築壘
以出入太湖而通浙賊之氣經程學啟等督軍分路進攻立破五
龍橋賊壘其嘉湖竄撲吳江同里之賊復於長板橋等處疊次被
創百龍橋八圯一帶賊營密布直至平望復經程學啟督軍進擊
生擒僞貴王陳得勝及悍賊千餘其破賊營三十餘座追至平望
該逆望風奔潰立將平望西首大橋拆毀逆匪三萬餘人逃出不
及一半實足申天討而快人心見在蘇州婁門葑門盤門各路俱
斷嘉湖援賊復受大創事機甚爲順手著李鴻章卽飭五龍橋寶

帶橋長生橋水陸各軍嚴密扼紮毋致爲賊所乘惟忠逆糾合各
僞王大股萃於西路力援無錫以護蘇城援賊一日不清則蘇錫
勢難進取見在護逆受創於芙蓉圩侍逆亦爲劉銘傳等逐退高
橋其鋒已挫卽著飭令各軍合力併圖忠逆先將該逆大股痛加
剿戮再行設法攻城惟值此蘇賊窮蹙各軍屢勝之餘尤當穩紮
穩進相機進取不可稍有挫失是爲至要將此由六百里諭令知
之○丁丑諭議政王軍機大臣等前據富明阿奏馳援蒙城招撫
諸圩各摺片當經諭令僧格林沁鼓舞反正各圩富明阿截賊糧
運唐訓方添兵分紮長淮衛等處茲據唐訓方奏援兵四集分投
並進剿撫兼施並平毀潁西捻圩等情各摺片與富明阿前奏情
形大略相同淮河南岸紳練田端書等引眾向官紛紛效順唐訓
方見已會同富明阿各給札諭許以優獎並懸立重賞購獻首逆

其劉府考城洛河上窯姚家灣一帶復令遊擊郭清標前往聯絡紳練著富明阿唐訓方乘此機會設法鼓舞以收人心並令該紳練等集團攻克下蔡以掣蒙城賊勢見在各圩既望風效順陸續來歸則苗逆之黨與日孤官軍之聲威日壯惟甫經反正各圩人心未定亟須分撥勁旅與之聯絡著富明阿唐訓方迅速籌辦見在蒙城米糧久斷浮萍樹葉亦將食盡勢將朝不保夕僧格林沁務當相度皖豫兩省情形先其所急相機援剿不可顧此失彼被脅各圩投誠助官聞該大臣行抵皖省歸者益眾卽著遵奉前旨懸賞奏獎多方鼓勵以散苗黨而孤賊勢富明阿見赴蒙城務當分兵斷賊水陸糧道激勵諸軍進攻賊營速解城圍毋稍延誤王才秀駐軍北岸之洪家灣兵力尙單卽著唐訓方飭令何紹彩一軍移紮該處並令朱淮森抽調兵勇前紮馬村溝以資鎮扼其王

莊曹老集一帶卽著飭令普承堯收撫各圩李世忠已親督大隊由五河西上李顯發亦率所部由馬村溝拔營繼進卽著唐訓方咨令該提督專攻南岸迅拔壽州並飭蔣凝學毛有銘等軍進取潁西各圩勦撫兼施以分賊勢唐訓方仍遵前旨撥兵攻復懷遠令苗逆兼顧不暇庶勦辦可期得手至南北兩岸進勦各軍後路仍著該撫察度情形何路喫緊卽分兵向何路策應毋稍大意將此由六百里各諭令知之○予江蘇殉難光祿寺署正金肇元等祭葬世職○戊寅賜黃大元等四十九人武進士及第出身有差○已卯諭內閣御史張瀛奏本年勾到黃冊刑部於情實出語後另行黏籤體制未協請照舊辦理一摺本年刑部呈進勾到黃冊曾諭令議政王軍機大臣大學士會同刑部逐起詳覈黏籤進呈請旨施行原因朕在沖齡兩宮皇太后親裁大政是以變通辦

理至情實各犯應決應寬均係該王大臣等公同詳覈逐起黏籤刑部何從擅爲擬議卽如奉天省之范庭向一犯情有可原該王大臣等亦僅能聲明雙請未敢遽懇寬宥是生殺之權操之自上並非竟委之於部臣也張瀛於此中原委並未深悉遽謂黃冊黏籤恐啟刑部擅擬之漸識見殊屬膠滯所請照舊辦理之處俟朕親政後自應率由舊章此時著無庸議○諭前因升任給事中卞寶第奏參幫辦軍務浙江黃巖鎮總兵黃彬不理營務侵吞釐金縱容部將擄劫商船捏報勝仗曾經被害家屬周姓等在巡撫衙門控告並所部水勇向降賊索取米價暨民團拏獲接濟賊米之船轉將民團懲辦各重情並經訪查該總兵實屬恃恩驕恣民怨沸騰當經降旨將該總兵撤去幫辦軍務總統水師卽行革職令都興阿解交曾國藩軍營聽候查辦茲據曾國藩奏查明該革員

三解鎮江城圍兩在揚州府境會合陸軍剿匪並在小河等口岸
疊次獲勝尙無擄殺難民捏報勝仗之事巡撫衙門並無周姓控
案沿江釐卡全歸臺局各員經理亦無罔利肥己實據所部水勇
向降賊索取米帳各節派員密訪均未查有確證惟游匪冒充兵
勇擾害商民商船牟利之徒裝米濟賊該革員巡視不周實屬失
於覺察請將該革員發往軍臺效力贖罪等語已革總兵黃彬被
參各情雖經曾國藩查無實據惟以幫辦軍務總統水師大員既
不能攻克城池肅清江面又不能禁遏奸匪接濟賊糧實非尋常
失察可比黃彬著卽發往軍臺效力贖罪○曾國藩奏本年七月
下旬太平逆酋古澧賢石埭逆酋賴汶鴻等乘青陽被圍時各糾
大股蓄意犯涇古逆一股踞聚茂林潘村等處甯國守將劉松山
督隊於八月初八日馳抵涇城與守涇之易開俊會商先擊章家

渡之賊以便徐圖茂林初九日劉松山易開俊令章瑞璿陳名鉦等分投前進道出丁家渡斬卡賊數人餘賊退入章家渡易開俊劉松山等催軍猛擊斬馘頗多突有花旗一股自金村來援章家渡敗賊回戈轉鬪陳青雲率隊斜刺而入章合才易德麟併力乘之王華國等從叢箐中鈔出賊後賊敗竄水南都易開俊謀之劉松山於十一日馳赴茂林至則鳳村李村之賊聞風悉遁乃以六旗攻茂林四壘以二旗攻潘村三壘茂林之賊踰橋來拒鄧光明等偪賊退至村口章合才率眾追之壘賊千餘來援易德麟騎隊橫出邀截章合才王華國等從村後包鈔賊隊遂亂壘賊亦潰其攻中二壘者爲歐陽廷易致中見古酋出巢督戰歐陽廷以一旗掠陣易致中昇巨礮轟之古酋負創返奔易開俊亦率勁隊馳至施放火器燔賊壘二座潘村三壘亦爲陳青雲張恆舟所破於是

合軍追逐又踏二壘於潘村之後餘黨向太平老巢而遁至甯國北路羣賊嘯聚聞劉松山赴涇甯郡空虛謀襲郡城十四日劉松山引軍馳回令各門繕修守具十七日諜報賊至油榨溝將以詰朝來襲劉松山令章瑞璿等夜出南門繞過敬亭山擇險設伏又令張聲壯易德麟等在西城嚴陣以待天甫向曙賊數千沿河擁至踰濠競進劉松山令張聲壯陳世隆等分剿西南兩門之賊自督胡文高章合才等自北門出攻賊不及備死於濠下者甚多驅賊至北門街張聲壯易德麟等適從西門追來遂將北門兩股一併擊退賊之在南門者將由敬亭山折竄而北不料伏軍橫斷歸路賊乃東奔廟埠劉松山又遣章合才等前後夾擊斬馘無算賊走濱河一帶爭舟舟覆多溺水者劉松山又於二十二日率張玉迪章合才等迎賊於廟埠賊不戰而退楊玉迪進軍油榨溝奮擊

帶傷突陣賊循河下竄維時涇縣之水南都尙有踞匪麇聚丁塘茶坑一帶二十四日易開俊密諭各營乘夜出奇雕剿比曉進圍四頁村執先鋒賊數百名斬之丁塘等處賊卡均被攻破賊由雲嶺西竄水南都旋踞平垣九月初三日易開俊軍次平垣五里許令蕭章開等分路進擊賊悉踰崖而遁初七日晏公塘零匪與壩頭曹溪各股倂退風坑易開俊於初八日出隊琴溪橋下設伏誘賊賊自風坑來撲曹義勝等接戰倂卻引入伏中歐陽廷等突出包圍亂刃交錯賊不能支敗往甯國縣而去臣查甯國涇縣地居皖南數屬之中自上年易開俊劉松山等統軍分駐兩城屢卻大敵復能馳驅援應保全大局把總鄧光武外委雷國英力戰陣亡均請飭部從優議卹左宗棠奏臣於富陽克復後卽飭康國器魏喻義與楚軍各營由富陽圍攻餘杭蔣益澧令劉清亮助之而自

駐畱下地方居中調遣兩路疊獲勝仗攻破城外賊壘賊卡數十處事機頗爲順利惟賊勢尙熾自杭城至餘杭連營數十里希圖抗拒臣本擬進駐富陽適得徽州各路警報太平石埭之賊紛紛過嶺犯及歙休夥祁各境劉典王開琳等各率所部防剿均獲勝仗賊雖敗遁歸巢另股時由績溪歙縣各境踰嶺紛擾又探皖北之賊圖越浙境以援杭州餘杭股數甚多嚴州防務喫緊臣未可遽離此間故暫緩富陽之行相機布置見聞青陽解圍逆賊有趨浙境之勢已分遣各營防守新城分水富陽並飭劉典暫緩出嶺相機截擊臣督親兵三營仍駐嚴州以期兼顧臣營中將士及地方印委各員多染疫物故者移紮新城分水各營亦然節交霜降疫氣仍未衰減殊爲憂煩 上諭議政王軍機大臣等逆酋古隆賢等糾合大股匪徒圖犯涇縣經甯國守將劉松山督隊往援會

同總兵易開俊合力迎擊連破茂林潘邨等處賊壘嗣甯國北路之賊謀襲郡城劉松山聞信馳回開門出擊賊股相率敗遁該鎮將等往來策應屢卻大敵剿辦頗爲出力惟石埭太平尙爲賊踞皖南羣匪蟻聚必須由上游各城掃蕩而下著曾國藩嚴飭江忠義李榕等激勵諸軍鼓勇前進迅將石太一帶賊壘悉數削平與易開俊劉松山等廓清皖南全境俾金陵之師無後顧之慮方爲妥善徽浙軍務互相表裏徽郡餘孽未清歛休夥祁路路可通難保不乘隙竄越浙境左宗棠自應仍駐嚴州相機布置著卽飭令劉典王開琳等嚴防徽郡各屬毋任該匪闖入其進逼杭城餘杭之師並著密飭蔣益澧分飭所部穩守營壘不可輕率前進致爲該匪所乘節交霜降何以該省疫氣尙未消除據奏營中將士及地方印委各員物故者尙多軍士如此百姓可知覽奏曷勝憫惻

該督務當宣布朝廷德意善爲撫綏感召 天和潛消疹癘以期
軍務日有起色將此由六百里各諭令知之○諭多隆阿奏官軍
馳抵鳳翔城圍已解及分兵各路援剿情形一摺鳳翔被圍至十
四月之久經陶茂林等督軍援救轉戰而前城圍立解皆由多隆
阿調度有方所向奏績深堪嘉尙見在甘省賊氛甚熾卽著飭令
陶茂林將附城賊壘並所屬回巢趕緊掃蕩迅赴甘省會合雷正
綰之師勦辦回逆毋稍遲誤雷正綰見已由邠州一帶赴甘力圖
恢復平涼曹克忠一軍又進勦白吉原老巢是甘省援兵雲集熙
麟務當督率各軍隨時分兵策應並就見有兵力慎重防剿毋稍
疏虞鳳翔各屬被擾一切善後事宜著劉蓉張集馨督屬妥爲辦
理多隆阿病體未痊惟因軍勢正順必須一鼓作氣迅奏膚功見
仍進駐醴泉分兵勦賊具見忠勇惻忱該大臣務當隨時調攝如

各路布置已定即可回駐省城稍息勞動另摺奏遵覆竇型等未能解晉緣由昨據愛仁奏請將閻丕敏施鵬寶型汪耀奎羅殿標李祝齡張維義解晉審辦當諭令劉蓉遵照解往見在劉蓉到省尙需時日卽著多隆阿按照愛仁奏提各犯一併派員解赴山西歸案審辦將此由六百里諭知多隆阿熙麟雷正綰劉蓉並傳諭張集馨知之○諭衛榮光奏請嚴緝北路奸匪暨責成河北鎮道防河各摺片據稱宋逆經僧格林沁擊散後黨與尙多伏匿直隸山東河南交界處所時有匪徒嘯聚劫掠與逆賊相通僧格林沁大兵南下伏莽四起將有變而加厲之勢請飭三省各督撫會商於連界地方擇一久歷戎行之員作爲統領挑選馬步各隊扼要駐紮並責令各州縣官實行保甲清查戶口使奸宄無所容身黃河爲河北彰衛懷三府屏障而三府又爲畿輔藩籬尤宜嚴加防

衛各等語所奏不爲無見直東各屬自逆匪倡亂以來屢次厚集兵力分路兜剿復特命劉長佑督辦三省剿匪事宜以期事權歸一僧格林沁督師攻剿已將各股匪次第剪除在逃各匪責令該管各地方官隨地搜捕並明降諭旨解散脅從捆獻首惡僧格林沁南下復畱定安統帶黑龍江及京旗官兵駐紮直東交界地方巡緝彈壓見在兵勇爲數已不爲少著劉長佑聞敬銘張之萬按照衛榮光條陳各節悉心酌覈分別試辦並各遵屢次諭旨督飭兵弁隨時訪拏一面力行保甲將宋逆黨與暨著名土棍責令戶首捆獻明正典刑以除稔惡而靖地方至黃河捍蔽河北三府防守最關緊要總因該鎮道等不能認真巡防致前此宋逆餘黨竄擾潛縣內黃時任令往返數次毫無阻遏殊爲可恨著張之萬責成河北鎮道講求營制扼要設防並聯絡鄉團於沿河一帶實力

守禦遇賊卽擊庶各匪不得肆意竄越而畿疆悉臻鞏固原摺片
著鈔給劉長佑閱敬銘張之萬閱看將此各諭令知之○總理各
國事務衙門奏採買輪船一事前經內外諸臣詳議不惜重價原
期利器歸公操縱由我將代買輪船之李泰國所定十三條駁正
酌改五條奏明行知各省此次管帶輪船之阿思本到後李泰國
忽將前次議定業經奏准之五條背而不遵仍將駁正不用之十
三條從新提起定欲照辦此十三條與札飭赫德李泰國原文設
立合同之意不符見與卜魯士等會商將輪船撤退買價仍由英
國交還中國卜魯士亦允照辦惟弁兵薪工及來往經費議由中
國備給並另賞阿思本銀一萬兩李泰國以辦船貽誤革退其總
稅務司一缺派赫德辦理該稅務司能否稱職再行察看具奏隨
時辦理得旨允行○以政績卓著予故福建道員前直隸知縣桂

超萬故浙江知縣徐台英列入國史館循吏傳○庚辰諭議政王
軍機大臣等劉長佑奏直境已無賊蹤見將兵勇分別撤留妥籌
善後一摺宋逆分股賊目邱得勝李得城程來書夥賊葛登幅梁
兆玉等二百八十餘名均經劉長佑飭屬拏獲正法岳金聲匪夥
亦悉數擒斬賊目程敬書已在山東館陶縣拏獲直隸全境已無
匪蹤前調兵勇自應分別撤留遊擊蔣希夷所部豫勇八百名著
劉長佑卽行撥赴河南交張之萬調遣俾資協剿其餘兵勇劉長
佑見擬挑選精壯三千名先後奏調來直之楚勇二千名其兵勇
五千名擇要分布勤加操練以備不虞此外卽行遣撤卽著照該
督所擬辦理據山東所獲賊目供稱宋憬詩改穿藍布棉襖冒充
孔姓乘馬向山路逃逸等語亟應嚴行搜捕以除巨憝而申國憲
著閻敬銘督飭屬員實力查拏儻按緝不力再令首惡乘間脫逃

致稽顯戮惟閻敬銘是問前據閻敬銘奏擬調團首陳貫甲歸標察看情形見在宋逆餘黨漸次搜捕淨盡直東兵力有餘著閻敬銘卽將陳貫甲調令歸標如該團首遵調前往該署撫卽設法駕馭妥爲拊循俾爲我用東省得此勁旅亦可藉資協助如敢任意抗違不遵調遣意萌反側著閻敬銘知會劉長佑會合兩省官軍協力進剿毋令養癰成患該署撫務當謀定後動不得稍涉輕率轉致一發不可收拾直東豫一帶土匪恐因僧格林沁南征復圖勾結昨已諭令各該督撫飭屬嚴行搜捕著劉長佑張之萬閻敬銘懍遵前旨隨時訪拏務絕根株是爲至要將此由六百里各諭令知之○諭恩麟奏平涼失陷賊勢鴟張請飭山西撥餉玉通奏賊撲郡城剿辦情形各摺片平涼府城失陷已據熙麟奏報見在多隆阿已派雷正綰督帶十營兵勇啟程赴甘陶茂林亦統率所

部於鳳翔解圍後進援甘省擬與雷正綰會合攻拔平涼規復固
原計雷正綰與陶茂林兵勇已有二十營之多不難迅掃賊氛惟
陝省敗匪陸續西竄雷正綰等軍僅止從後尾追恐賊勢益形滋
蔓多隆阿務當飭令雷正綰等軍繞道迎截俾該逆不能西竄不
可徒事尾追並著熙麟派撥兵勇會合夾擊以期四面兜剿速奏
膚功涇州一帶已經熙麟就近派兵扼紮西路之隆靜一帶防兵
甚單著恩麟再行添募勇丁迅速前往以固省垣門戶南路之西
和鹽關賊匪尙未剿滅伏羌匪徒復逃至秦安岷州回匪復行滋
事又臨洮華寺回匪撲近西甯郡城河州狄道回漢亦互相仇殺
情形喫緊該省賊匪蠭起竟有應接不暇之勢多隆阿督辦軍務
兩省防剿事宜均應統籌兼顧著卽飭令在事文武將該匪次第
掃除毋畱餘孽陶茂林雷正綰均統率所部赴甘甘省東路兵力

足敷勦辦西路尙覺空虛馬德昭到甘後應否飭赴蘭州抑或卽
畱於慶陽軍營派令帶兵之處均著熙麟酌量辦理至花寺回匪
賊首馬歸源僞行乞撫仍復環繞郡城焚殺並分股盤踞東關南
山抗拒官兵一股在北川焚殺攻撲番寺實屬兇頑異常見經阿
家呼圖克圖帶領僧勇等二千餘人助勦殺斃賊匪多名著玉通
卽飭令兵勇會合攻擊並激勵番僧等迅將該匪殲除將此由六
百里諭知多隆阿雷正綰熙麟玉通並傳諭恩麟知之○諭勞崇
光張亮基奏克復普安廳城見籌勦辦新城踞匪進圖貞豐興義
髮逆竄擾松桃廳境請將總兵李有恆革職勒限勦賊各摺片普
安廳城爲回匪龔踞千總李馥署同知錢壩等督練攻克擒斬多
名餘匪逃赴興義見在普安安南二縣亦經收復勞崇光等已飭
將弁分軍進勦貞豐新城著卽督令在事各員迅將該二城攻拔

進軍興義與廣西知州陳錫藩會合夾擊以期埽蕩逆氛髮逆李
宰輔等經婺川兵勇擊退後逃往四川彭水縣境復由酉秀等處
竄入黔省松桃廳同知劉侶鶴等督率兵勇擊退追至湖南邊境
弭落地方此股逆匪往來川黔楚南邊境奔突靡常非三省合剿
不能杜其紛竄著勞崇光張亮基駱秉章惲世臨各派兵勇合力
攻勦務將該匪四面兜圍迅速殄滅不得稍分畛域致令乘隙奔
逃復形滋蔓畧威甯鎮總兵李有恆玩視軍務強截餉銀著先行
革職勒限兩箇月攻克豬拱箐賊巢以贖前愆儻再任意遷延卽
將該員正法以肅軍律勞崇光等另摺奏克復舊縣請將陸傳應
賞加按察使銜該員前因辦理釐金經毛鴻賓奏參有扶同徇隱
情弊曾經降旨暫行撤任交惲世臨查辦著俟結案再行酌量辦
理又另摺奏楚省帽子山匪徒勾結苗教各匪竄擾松桃廳屬四

十八溪一帶著卽飭令金太文由銅仁張家寨移師進剿實力殲
除下江廳有無賊蹤速卽探明剿辦壩芒賊匪距省甚近尙大坪
之賊竄擾開州均應亟爲掃除著卽分飭沈宏富趙德昌等迅速
攻克毋稍遷延勞崇光張亮基摺稱抵黔後痛除陋弊將士感奮
立功數月之中疊克城寨甚多較之從前韓超田興恕所辦軍務
自覺氣象一新惟奏報軍情務期嚴飭帶兵員弁字字從實不得
稍有粉飾尤須力戒滿盈以身作則俾吏治軍務日有起色方爲
不負委任懷之勉之徐之銘見已革職所有雲南近日情形著勞
崇光張亮基勤加偵探隨時具奏將此由六百里各諭令知之○
以全慶爲工部右侍郎

由內閣
學士遷

○以貴州攻克張家寨賊巢生擒

首逆蕭汝魁賞總兵金太文一品封典○予貴州陣亡府經歷鄧
長清祭葬世職○辛巳諭議政王軍機大臣等張之萬奏南召擊

賊獲勝情形一摺。竊張總愚股匪腐聚南召城南之草店地方。圍攻山南太子望寨。經張曜派兵與寨勇內外夾擊。立破賊圍。復督兵圍敗賊於七里灣。並將撲營之賊奮力擊退。連日擒斬甚多。此股逆匪人數眾多。最爲兇悍。尤須防其西竄秦疆。張之萬已派兵分扼鎮平內鄉杜其窺伺。仍著飭令在防將士實力堵遏。並令張曜力顧西路。以杜紛竄。一面督率兵勇聯絡鄉團實力進攻。毋任久踞南召一帶。團練尙能齊心禦賊。該撫當飭在事文武多方鼓勵。力籌堅壁清野之策。俾擒賊無糧。可據自不能久踞該處。阻險爲巢。俟倂令出險後。即可盡力痛剿。勿令蔓延他處。如該逆窮蹙遁回老巢。卽著毛昶熙整齊兵團扼截迎剿。務期殄除淨盡。不准縱令逃歸。致貽後患。將此由六百里各諭令知之。○諭張凱嵩奏髮逆闖入粵西分股狂奔見飭西北兩路兵勇堵剿一摺。李幅

猷股匪由楚省之青林界竄入粵西龍勝廳境後隊之賊退至斗江關入懷遠縣境內城步之賊復由興安五排僻徑竄至界首圖擾粵西省城北路復經勇練截殺多名退出湖南道州地界斗江一股擾及融縣復被紳團洞練到處截擊折回懷遠此股逆匪由楚入粵復由粵入楚分合無常奔突靡定必須界連省分會合兜剿方可杜其分竄見在分擾道州一股雖在楚南境內惟該處界連兩粵往返奔逃勢甚便捷著毛鴻賓晏端書郭嵩燾張凱嵩惲世臨分飭兵勇嚴扼分界要隘並令三省將弁聯絡聲勢前截後追以期迅掃逆氛惲世臨亦宜振刷精神嚴督在事文武將道州股匪就地殲除不得以驅逐出境卽爲了事懷遠地方界連黔粵楚三省著勞崇光張亮基惲世臨派撥兵勇分扼險要勿令竄入並著張凱嵩督飭兵練將茶溪水團一帶之賊實力剿洗毋任他

竄將此由六百里各諭令知之○予廣西陣亡總兵官胡元昌祭葬世職○壬午諭議政王軍機大臣等官文等奏大股捻逆圖擾漢鎮經官軍奮力擊退並鄖西擊賊獲勝及遵覆李雲麟一軍毋庸另設糧臺各摺片此次東竄捻股圖擾漢口經總兵楊朝林等督軍擊退敗竄河南羅山縣屬之鐵鋪耿家樓一帶著官文等督飭在事員弁乘勝跟追毋令稍定喘息張之萬迅派得力將弁迎頭截擊儻再任其紛竄蔓延惟張之萬是問其南竄應城長江埠一股經副將王桐柏等軍分路追擊疊挫賊氛惟餘逆盤踞宋埠中館驛料棚一帶必須迅速殲除著官文嚴飭舒保王桐柏等合力兜擊毋畱餘孽該逆不得志於漢鎮或東犯蘄羅則皖北防堵尤關緊要著曾國藩督飭陸路兵勇於英霍一帶扼要嚴防實力堵剿毋稍疏懈陝南逆匪圖竄鄖西雖經官軍擊敗而賊蹤飄疾

難保不去而復來仍著官文等飭令鄖陽鎮守嚴密扼堵不得稍有鬆勁李雲麟一軍僅三千三百人爲數不多自無庸由湖北另設糧臺分局且據官文等奏該營餉項九月以前早已發足其十月分之餉亦將起運所需軍火源源接濟等語是李雲麟一軍並無缺餉之虞見在漢中城固俱陷賊勢方張李雲麟當乘此士飽馬騰剋期會師進取不得藉籌餉爲詞虛糜取巧貽誤戎機致干重咎劉蓉已抵保甯何以尙無續到奏報著卽星馳前進速抵漢中督率各軍埽蕩漢郡踞匪以副委任將此由六百里各諭令知之○諭吳棠奏陳國瑞連日出隊進剿擬先過河駐紮截賊糧道暨剿辦後路捻股並購拏宋逆各等語前經疊次諭令富明阿派軍駐紮渦河上游截賊糧運以牽制賊勢此次陳國瑞擬由王家寨設法渡河駐紮斷其陸運以扼其吭實爲制勝要著卽著富明

阿督飭該總兵率領得力兵弁設法渡河扼紮以圖進取南岸賊營密布恐該總兵一軍尙嫌單薄見富明阿率所部馬步四千餘名並前派宋慶一軍一千三百名均已到蒙卽著嚴飭諸軍奮力進剿迅解蒙城之圍並著唐訓方相機添撥勁旅分投策應勿專待僧格林沁一軍致有貽誤至臨渙一帶捻首李大箇子等尙在楊句背圩屯踞見經陳國瑞派撥馬隊令張保聖等會合副將艾憲銀儘力按捕卽著吳棠嚴飭該將弁等認真剿辦以顧陳國瑞等軍後路糧道昨據劉長佑奏據山東所獲賊目供稱宋憬詩向山路逃逸等語其曾否潛匿徐屬皆未可知著吳棠仍遵前旨嚴飭各州縣懸賞購緝嚴密訪拏務獲以絕根株此次吳棠由六百里馳奏正摺係捐輸請獎及加廣學額尋常事件反將蒙城等緊要軍務夾片陳奏實屬不知緩急吳棠著傳旨申飭將此由六百

里各諭令知之○諭徐宗幹奏臺灣官軍剿平南路逆壘見飭迅復彰城並請將吳鴻源暫緩拏問一摺臺灣軍務正在喫緊既據徐宗幹奏稱吳鴻源尙知奮勉卽著暫緩拏問畱營效力自贖儻仍前貽誤卽著仍遵前旨拏問治罪丁日健業經放洋對渡淡水卽著飭令該員登岸後調齊北路各軍號召舊部得力丁練會同曾玉明各軍收復彰城再將嘉義餘孽搜捕淨盡以絕根株林文察已抵蚶江口配船候渡彰邑湖仔等莊經曾玉明等會同文武各員勦撫兼施悉臻安定彰城賊勢已孤著左宗棠徐宗幹嚴催林文察曾玉明等督飭南北各軍合隊進兵攻拔堅城擒斬首惡力圖廓清不得以勦辦漸次得手稍形疏懈至汀延土匪經文武員弁節節追勦斬馘無算零匪百餘人翻山竄入粵省界內而首逆李阿四改裝商賈由僻路逃回廣東嘉應州原籍渠魁未獲終

貽後患著毛鴻賓晏端書郭嵩燾嚴飭所屬一體會拏務將首犯李阿四擒獲逃入粵界之零匪捕拏淨盡毋任漏網並著左宗棠徐宗幹飭令汀延等屬文武各官設法購緝一面按拏延順等處逸匪務期悉數弋獲以靖地方將此由五百里各諭令知之○癸未 慈禧皇太后聖壽節停止升 慈甯宮○予湖北陣亡遊擊

蕭祖繩等祭葬世職入祀昭忠祠○甲申諭議政王軍機大臣等前因滿慶等奏瞻對野酋糾眾圍困裏塘正土司官寨等情當照所請諭令駱秉章酌調土兵援剿並協撥兵餉旋據崇實駱秉章奏西藏土兵沿途滋擾請令撤回並密陳呼徵呼圖克圖與汪曲結布構釁情形及李玉圖挾制主使請調開以離其黨均經照所請飭辦又文祥等奏審辦呼徵呼圖克圖一案當將滿慶等先後奏報自相矛盾之處復諭令福濟景紋秉公逐款詳訊迄今數月

之久土兵曾否撤回贍對情形若何道員史致康等前往開導能
否遵諭解散未據該將軍等覆奏而福濟竟以路梗折回成都杳
無赴藏信息朝廷正深慮念茲據滿慶等歷陳呼徵捏具冤詞聲
明原案始末並委員李玉圃啟程馳赴乍察相機辦理贍逆事務
參劾拉里糧務嚴清榮任性乖張並爲達賴喇嘛汪曲結布代進
奏書及喇嘛呈進貢物各摺片覽滿慶等所奏如呼徵冤詞內有
兩寺喇嘛與彼送銀五十兩哈達一箇令其進京告狀一節滿慶
等則稱該喇嘛聞知呼徵有苛派銀兩之事故意送銀形容以示
羞辱殊出情理之外所稱總堪布膽敢向山上放槍係奉呼徵之
命而來等語無論呼徵未必果有此事而總堪布一經放槍卽被
執事人等捆縛所帶土兵何竟無一人援救滿慶等旣知汪曲結
布與呼徵有切齒之仇何以將伊調藏汪曲結布旣係僧眾及辦

事大臣調來而滿慶摺內則稱呼徵求調汪曲結布來藏並非好
意有半途劫殺之心亦未免有心文致汪曲結布曾充噶布倫台
吉於咸豐八年辭退曾經滿慶奏明惟呼徵供稱汪曲結布係有
罪革退之人史致康言伊卽係解回配所之壁喜究竟汪曲結布
有無發遣案據均應逐一查究著福濟景紋於抵藏後迅將呼徵
與汪曲結布呈訴各情前後諭旨內駁詰各節確切查明如滿慶
等有與汪曲結布朋比爲奸捏詞飾奏情弊卽著據實嚴參並將
汪曲結布撤退斷不可令其把持藏務如滿慶等所奏並無虛捏
汪曲結布果爲僧眾所信服其辦冤奏書所列濟瀧呼圖克圖眾
頭目出具圖記之處均係情真事實卽可俯順輿情令汪曲結布
協理藏務用示羈縻是在福濟等斟酌妥爲辦理以安藏地至汪
曲結布於道員史致康等稟稱瞻對台藏東路滋擾已非一年蠻

觸相爭非同侵犯內地等語曉曉置辨謂天朝有外之之意史致康等此稟不過因川省軍務未平暫緩進兵起見駱秉章何遽咨行駐藏大臣衙門致僧俗得以互相傳播藉爲口實未免疏忽滿慶等接到此咨未將漢文義理向僧俗明白解說致令驚疑亦屬不合本日已嚴諭滿慶等妥爲宣布安撫土兵旣不得力而瞻對又不可理論豈可任其恣意侵犯致梗驛路川中兵勇甚多見在屬境亦頗安謐著駱秉章迅卽調派得力將領酌帶勁旅勦洗瞻對匪徒務令藏路疏通而明正土司等得以各安生業以副朝廷懷柔遠方之意至所稱東路法國羅勒拏蕭法日等於今春派無賴劉姓由鎭城運來茶包在巴裏一帶散給漢兵要結人心並捏造謠言誘惑巴塘正副土司投赴瞻逆是否有此情事著崇實駱秉章查奏又羅勒拏等聲言景紋奉有諭旨將前藏所屬之擦瓦

博木噶地方賞交伊等永遠管理凡有天主教之人進藏者不准
阻止等語如果屬實是該教士假傳詔旨殊屬可惡除諭令總理
衙門向法國駐京公使據理駁斥外著崇實駱秉章嚴飭沿邊各
屬認真查察如有內地傳教之人潛赴藏地者概行截回毋令乘
間偷越披楞因法國有入藏傳教之信亦欲來藏通商其意實屬
叵測廓爾喀於去冬遣人來藏復修舊好其西北各小部落亦願
與藏永作藩籬著福濟等乘勢利導飭令廓爾喀等永敦舊好嚴
密防範以杜披楞窺伺之心糧員嚴清榮有無與羅勒拏暗中勾
結情事是否將由藏截回川省之教民吳姓畱住江達署中擅將
由藏發出摺報停壓六箇時辰捏稱有蠻子二人來搶此摺種種
紕繆不可不嚴切根究著駱秉章卽將嚴清榮撤回秉公查辦另
選賢能之員前往接管糧務據滿慶奏委員李玉圃帶領把總馬

騰蛟等及漢番兵丁人等馳赴乍察一帶相機辦理剿撫瞻逆事務等語所調土兵前已有旨撤回李玉圃曾否遵旨來京抑或尙在乍察著駱秉章查明奏聞李玉圃係時徵案內待質要證已諭令滿慶等仍遵前旨飭該糧員迅速來京矣福濟等折回成都時聲稱藏中事務隨時與將軍等面商今既數月試問所商何事作何辦法又云一俟驛路疏通卽速赴藏以副委任見據滿慶等奏藏中僧俗大眾盼望福濟景紋二人來藏將各案辦結以安人心已飭商上特派曉事番目持達賴喇嘛夷札赴鎪面見明正土司諭令按站迎送是驛路不患梗阻且滿慶等奏報可以東來福濟等行李豈不可以西去福濟前因規避雲南省分延不赴任獲咎甚重經朝廷棄瑕起用復敢安坐錦城不思設法馳赴藏中將交查案件迅速辦結竟是故態復萌大不曉事著卽恪遵疊次諭旨

會同景紋星速前進不准再事耽延儻仍以路梗爲辭致藏眾日久生心藉端滋事而滿慶等反得倚恃汪曲結布等爲藏身之固定將福濟景紋重治其罪勿謂言之不豫也滿慶等摺片五件代進達賴喇嘛等奏書四件均著鈔給崇實賂秉章福濟景紋閱看將此由六百里各諭令知之○諭滿慶恩慶奏將徵捏詞誣控聲明原案始末並勦辦贍對各摺片又代進達賴喇嘛等奏書四件前因將徵控訴各語均係一面之詞萬難憑信諭令滿慶恩慶傳知李玉圃迅速赴京質對此次滿慶等滯陳將徵捏詞妄控各情是李玉圃被誣冤抑事必有因惟案關藏地構釁非李玉圃親來質對不足以折將徵案內一千人證之心卽著恪遵前諭飭令該糧員迅速來京無任遲誤至道員史致康稟內有蠻觸相爭等語此係指瞻對等而言汪曲結布等何得卽以棄同化外眾心疑懼

等詞遽行呈訴滿慶等於此等咨文何以不將漢文義理向其解說致令驚疑殊屬不知大體著卽宣布朝廷德意妥爲拊循告以我朝撫有中外一視同仁況爾等受累朝豢養之恩豈可因委員稟詞懷疑越訴惟當靜候欽差赴藏秉公查辦一切冤抑斷無不伸之理至藏中土兵仍應遵旨斟酌遣撤如膽對野酋不遵理論卽由滿慶等酌畱馴良兵練扼守界藏仍咨明川督剿辦川省大軍翦除羣逆自當無堅不摧兇悍如石達開一股亦且殲滅無遺矧茲瞻對豈能螳背當車大兵一到卽可解散藏內人民何必妄生驚畏如此明白開導必能照舊相安此次汪曲結布等違例擅遞奏書本應查究姑念其向化情殷是以諭令福濟等趕緊赴藏持平妥辦以示體恤嗣後除應行呈遞奏書者照例呈遞外餘俱不准呈遞以符定制至羅勒拏等意欲入藏傳教西藏官民力阻

其行具見惻忱本日已諭知崇實駱秉章等遵照條約設法攔阻
矣其披楞西入之語尤宜先事豫防見在廓爾喀雖已修好其西
北各小部落亦甘與藏永作藩籬而邊備仍不可一日懈弛著滿
慶等督飭汪曲結布等妥籌防範不得稍涉大意糧員嚴清榮既
據滿慶等因其不洽番情撤任候審已諭知駱秉章將該員撤回
查辦色拉寺喇嘛刁玩恐生事端著滿慶等相機妥辦寬嚴合宜
以杜後患摺內有派人曉諭明正土司安站通道之語並著安速
辦理疏通道路庶福濟等可以早日抵藏將此案早日辦結永息
爭端以副維持黃教之意將此由六百里各諭令知之○乙酉諭
議政王軍機大臣等毛鴻賓奏官軍疊破賊隘匪黨投誠斬獻首
逆畱張運蘭防剿楚界並粵庫支絀籌辦鹽釐情形各摺片高州
官軍於攻克白花塘等賊巢後與內應匪首李安等內外夾擊克

復嵩坡安良堡追至龍頭垌復將該寨克復乘勝攻拔黃塘被脅難民吳公謨等將大坡墟地方獻出其化州所屬之寶墟亦經黃興芳等投誠內應與團眾內外夾擊將賊巢攻破賊黨鄭金劉超密約在信宜舉事將逆首陳金缸並其眷屬親信黨與二百餘人殺盡情願薙髮歸順獻回信城辦理尙爲得手惟東岸大井賊巢尙爲賊踞信宜縣城尙未收回鄭金劉超與陳金缸互相吞噬是否真心悔罪尙未可靠著毛鴻賓郭嵩燾崑壽督飭在事文武剿撫兼施速將信宜縣城收復並將鄭金等投誠一事妥籌辦理不可稍涉大意致餘黨復萌反側崑壽所部兵勇不可遽行撤退以資鎮撫總期一勞永逸毋令餘匪復行滋蔓楚南賊氛方熾毛鴻賓見將張運蘭一軍畱楚勦辦李幅猷股匪著卽飭令迎頭截擊毋令闖入粵東江西邊境劉德謙所部七百人見已到粵卽由該

督安爲調度至該督所稱藩關各庫收支數目入不敷出各關所支稅銀正額未充必須另籌鉅款等語見值粵東各屬客匪伏莽尙多未能一律肅清江南粵匪未平需餉甚急該督撫務當悉心經理開源節流力籌接濟不得藉詞推諉見在內務府庫項支絀待用甚殷歷任粵海關監督於內務府應用之款任意拮欠疲玩已極著毓清趕緊將欠解各款陸續籌解以應急需儻再遲延推諉惟該督撫監督等是問粵東鹽船走私積弊日甚毛鴻賓商曾國藩飭令總兵任星元統領水師赴粵彈壓剿捕著卽照所擬辦理該督惟當籌添勇丁船礮督飭該總兵實力巡查力除積年舊弊總期言行相符不得有名無實應辦釐務亦當與郭嵩燾悉心籌畫安定章程辦理力杜科派抑勒中飽分肥諸弊以裕餉源將此由六百里諭知毛鴻賓郭嵩燾崑壽並傳令粵海關監督毓清

知之○丙戌諭內閣官文等奏請將失守城池案內之該管鎮道知府各員免議等語上年髮捻先後竄陷湖北鄖陽府屬之房縣等處城池該管文武各員於所屬州縣未能督率固守本有應得處分惟前任安襄鄖荆道另案降補同知金國琛力守襄樊疊次擊賊獲勝至房縣失守時係王璐護理安襄鄖荆道到任未久聞警飭屬力保襄樊賊知有備不敢回竄前署鄖陽鎮總兵訥欽前署鄖陽府知府艾浚美當賊匪圍攻郡城登陴堅守城垣賴以保全功過均足相抵訥欽金國琛王璐艾浚美所有此次應得處分均著免其置議○諭議政王軍機大臣等略秉章劉蓉奏確查援陝各軍先勝後挫實在情形劉蓉另摺奏漢中郡縣失陷賊勢蔓延見籌布置情形又另片奏請飭催李雲麟進駐興安力圖進取各等語陝南逆燄鴟張不獨已陷各城難於收復卽附近興漢州

縣亦甚可危近日賊眾四出時向通江南北毗連之龍池場等處
擄糧裹人大有窺伺川疆之意劉蓉見在督飭諸將收集殘兵嚴
防各隘並檄毛震壽將兩城潰卒妥爲資遣易佩紳所部亦飭大
加裁汰一面派員回楚募勇三四千名練成勁旅擬俟果後九營
到齊進駐青石關先固川省門戶相機雕剿或孤軍未能獨進則
改由廣元甯羌以圖褒沔各等語所籌均尙周妥第添募之勇到
營尙在臘月所調之副將唐星照又遠在江西且須回湘募勇亦
恐緩不濟急而毛震壽又係革職畱營差委之員尤恐威望不著
呼應不靈設該匪乘機肆逞則陝甘川楚邊境在在可虞劉蓉身
任封圻責無旁貸著卽趕緊部署就見有兵力或分防青石關徑
由甯羌進圖褒沔俾該匪偵知蜀兵將至有所顧忌不敢紛竄爲
患徐圖相機前進方爲妥善畱壩廳爲入西安要路劉蓉勢難兼

顧並著多隆阿酌度情形如兵力有餘卽抽撥馬隊千餘名駐紮
畱壩以遏該匪北竄之路劉蓉到任尙需時日張集馨署理撫篆
斷不可存五日京兆之見所有應辦要務必須實心整頓其漢南
一帶應行防剿之處並著隨時與多隆阿熟商妥辦毋誤事機劉
蓉所統各軍指日抵陝所需餉項如司庫稍有存款張集馨仍當
力籌撥濟以利軍行李雲麟計已行抵興郡該京卿所部係特派
援陝之師著俟布置稍定卽約會劉蓉分路進剿以收夾擊之效
見在竄鄂捻匪疊經官軍剿敗不日卽可撲滅其張總愚一股亦
經豫軍於魯山等縣跟蹤追躡諒亦不至闖入楚境著官文嚴樹
森熟審近日軍情如賊勢稍鬆梁作楫等水陸各軍毋須回顧襄
樊卽飭令泝流而上進紮興安以壯李雲麟後路聲勢正在寄諭
間據熙齡奏西安敗匪紛竄崇信之神浴河平涼之白水鎮華家

莊等處請飭多隆阿迅催雷正綰星速赴援等語雷正綰前已統帶十營由醴泉直趨固原著多隆阿飛催該提督鼓行而西毋稍遲滯鳳翔餘匪計已搜捕淨盡並著催令陶茂林督隊赴甘以期厚集兵力攻拔平涼等處迅掃逆氛熙麟仍當督飭各軍分投策應雷正綰各營軍需如有必須接濟之處並著妥籌接濟將此由六百里諭知官文多隆阿駱秉章熙麟嚴樹森劉蓉李雲麟並傳諭張集馨知之○諭劉蓉奏籌辦川省鹽釐應由井竈抽收請旨飭辦一摺據劉蓉奏川省鹽筴之利井竈實居其源而商販特承其流向來辦法僅抽官鹽餘鹽從未議及井竈該撫擬仿就場起課之法倡爲按鍋計鹽按鹽定釐之議並擬編聯保甲稽查偷漏查川省各廠井竈秦人十居七八蜀人十居二三如所收係秦人貲本者卽歸陝餉所抽係蜀人貲本者卽歸川餉等語劉蓉見辦

漢南軍務當陝省凋敝之後無款可籌而漢中各軍新敗必須添募勇丁製備軍火鍋帳等項需費尤鉅自不得不借資鄰省協濟川省竈戶有井以爲之本與他省竈丁不同該撫所陳按鍋計鹽按鹽定釐之議似屬可行且係從未抽捐之戶以秦蜀商人各協本省軍餉自應情殷桑梓踴躍急公著駱秉章按照劉蓉所奏認真興辦惟事屬伊始必須於國用有裨於竈戶無損仍恐興辦伊始有奸商劣紳從中阻撓把持射利亦不可不嚴爲之防其未盡事宜著該督飭令該司道等妥爲覈議以期萬全無弊至摺內所稱如能歲籌二三百萬不惟秦蜀實賴其利等語該省竈戶是否能籌此鉅款並著該督酌量辦理斷不可竭澤而漁致使竈力疲敝或致別滋事端原摺著鈔給閱看另片奏四川勸辦山西陝甘等省捐輸擬就章程四條咨商駱秉章飭司道等妥籌辦理該督

卽飭在局司道等曉以大義俾各情殷報效惟須涓滴歸公不得有名無實用資協濟將此諭令知之○諭前因有人奏護理陝甘總督甘肅布政使恩麟辦理回務專藉招撫爲補苴之計致令回勢鴟張生民塗炭省南省北一帶滋蔓難圖養癰貽患有誤大局請飭查辦等語當經諭令多隆阿熙麟嚴密查奏茲據熙麟奏恩麟係伊族弟懇請迴避一摺已准其照例迴避其恩麟被參一案著改派慶昫會同多隆阿按照所參各款秉公查訪據實具奏甯夏與蘭州密邇見聞較確想慶昫必能嚴密確查不敢稍涉徇隱代人受過也原摺著鈔給慶昫閱看將此由五百里各諭令知之○諭滿慶恩慶奏代進廓爾喀國王表文一摺廓爾喀額爾德尼王蘇熱達熱畢噶爾瑪薩哈因奉到敕書免其呈進例貢俟同治六年再爲進呈感激恩施呈遞謝恩表文覽其所奏情詞極爲恭

順深堪嘉悅至該國王表內所稱咸豐二年專差呈進例貢途中
正值軍務噶箕人等曾受苦累等語亦係實在情形著俟同治六
年應屆進貢之期由駐藏大臣酌度情形先期奏聞再降諭旨將
此各諭令知之○諭李續宜迅赴皖省勦辦苗逆○命英桂接濟
劉蓉行營軍餉○予四川陣亡總兵官賀蘭桂陝西殉難知縣周
蕃壽等祭葬世職○丁亥富明阿奏臣自長淮衛啟程正值蒙城
危急因卽星速前進十月初一日行抵宿州將軍火等項船隻運
至同亭改由陸路轉運蒙城而同亭東西均悉苗逆捻匪出沒之
區爲糧道所必由先飭翼長詹啟綸率領前敵兵二千名整隊往
護初四日探聞捻首項盤陳坎李大箇子等糾約苗黨及各圩捻
匪馬步賊六七千名攻撲唐家莊意圖截我糧道臣一面派撥千
二百人護糧一面親督馬步兵勇八百名迎勦行抵袁家集據報

逆隊五六千人已至唐家莊一帶卽派副都統克蒙額督帶馬隊潛赴八里莊設伏令侍衛壽昌委營總富陞等帶馬隊分路進攻臣督隊繼進至唐家莊地方該逆列隊抗拒我軍迎擊鏖戰多時適克蒙額伏兵由賊後衝出馬步從旁包鈔壽昌富陞攻入賊陣槍斃賊目二名餘賊敗退我軍乘勝追殺三十餘里殲賊千餘名生擒百餘名因天晚未能窮追旋經收隊此次以少勝多獲此大捷固屬兵勇用命實由克蒙額壽昌富陞等三員勇敢直前首先陷陣所致應懇 天恩先行鼓勵其餘在事出力官兵容臣查明再行請獎臣收隊後因思同亭至蒙營後路並無官兵駐紮甚屬空虛恐苗捻復乘軍糧有阻當撥兵勇千名於同亭袁家集侯家樓等處分布駐守臣於初六日行抵蒙城面晤陳國瑞詢悉疊攻賊營獲勝九月二十一日派總兵郭寶昌等帶勇渡過南岸宋慶

一軍由東向南連紮十數營二十九至十月初二等日攻奪賊營數座英翰一軍亦渡過渦河南岸由西向南連紮十數營臣擬俟詹啟綸營盤紮定卽抽撥英翰之軍再向南鈔截斷賊糧路初七日臣親率馬步各隊由渦河兩岸直抵蒙城距北門二里許察看情形見該逆圍城窆濠三道四面賊壘林立壘外小濠數層沿河均壘叢密翼以礮船踞守浮橋一道當用開花礮轟擊斃賊無數該逆堅閉不出詹啟綸偏近南岸賊壘搶築四營初八日賊於浮橋口添築土壩我軍槍礮環擊攻毀賊營兩處斃賊數十名卽飭王萬清在北岸緊逼賊壘搶築四營是夜詹啟綸復築三營英翰等馬步各隊進攻蔡家圩一帶截賊糧運奪獲賊糧甚多惟城中情形甚爲急迫李世忠濟蒙雜糧一千石已解到小澗集臣擬先奪該逆浮橋將解到小澗集及屯營軍糧湊足千石載入礮船乘

機運送入城如浮橋不能卽得卽當步步爲營暗開地道設法運濟總期城中得食然後督軍輪攻庶可得手又奏臣因蒙城危急滾營前進並飭統帶淮蒙諸軍署廬鳳道英翰隨同進剿該軍鉛丸火藥一概無存當此剿辦喫緊之時豈可任其缺乏臣見已分撥接濟以資進取追溯蒙城所以被圍任令苗逆空濠築壘及懷遠失利之故實由唐訓方不能豫先籌顧致誤大局容臣詳細查明再行具奏 上諭議政王軍機大臣等富明阿於抵蒙後親督馬步各隊由渦河兩岸直逼賊營似此南北兩岸官軍漸逼漸緊不難次第掃蕩直抵蒙城著該將軍迅卽督同陳國瑞嚴飭各軍鼓勇前進將城外賊壘設法剷除其浮橋一道最關緊要務當激勵各營將領將開花礮擇要轟擊密派軍士乘勢搶取以期直達蒙城則該逆自必解圍遁竄城內情形危急盼糧甚殷實屬刻不

容緩富明阿擬將小澗集雜糧及屯營米石載入礮船乘風運送自應如此辦理但必須奪回浮橋方無阻隔所稱如浮橋一時不能卽得擬暗開地道設法運濟之處能否確有把握仍著富明阿審度情形斟酌妥辦翁同書前因駕馭苗逆失宜又未能固守壽州致該逆得肆猖獗獲咎甚重卽到營亦斷不能得力所請令該革員來皖效力之處著不准行該將軍如欲招致附苗各圩自可咨會唐訓方委派馬新貽妥爲安撫化導該藩司在皖北有年熟悉地方情形皖北紳民諒無不樂爲之用也李世忠尙能解運蒙城糧石足見其心尙無他該將軍可隨時相機籠絡俾知奮勉立功英翰一軍鉛丸火藥一概無存豈不貽誤攻剿雖經該將軍撥濟仍著飛咨唐訓方源源撥解毋令缺乏並著查明貽誤情形隨時具奏將此由六百里諭令知之○諭催賈洪詔赴昭通籌辦滇

餉○以捐備馬匹賞車臣汗札薩克頭等台吉明珠爾多爾濟貝子銜世襲罔替○戊子 上奉 慈安皇太后 慈禧皇太后詣

文宗顯皇帝聖容前供奠釋服○諭議政王軍機大臣等閻敬銘奏續獲賊目餘匪殲除殆盡籌辦善後及酌畱各營擇要布置各一摺據閻敬銘奏賊目劉厚德張逢海在陽穀縣之劉家樓潛藏當經派弁帶勇擒獲並將賊目程敬書於館陶縣地方拏獲盡法處死惟首逆宋憬詩仍未就獲元兇漏刃棄眾潛逃如果各該地方文武官紳嚴密兜拏何難及早擒獲閻敬銘前奏於宋逆翻山逃遁卽稱東阿知縣吳樹聲等跟蹤追捕嗣後作何究竟豈得任聽該地方官吏等妄行捏稟毫無實際宋憬詩一犯著閻敬銘懷遵疊奉諭旨嚴督所屬迅速搜拏務獲斷不准任令免脫致干咎戾劉長佑亦卽嚴飭直省毗連各屬一體搜拏毋稍鬆勁東省

防兵該撫於定安保德兩軍外酌留丁寶楨等營分紮東昌屬境都司馬春嶠一營駐紮武定守備郭大勝一營駐紮德州平原等境往來梭巡所籌均妥直東連界各屬尙多騎馬賊匪出沒肆擾著劉長佑閻敬銘各飭兩省帶兵文武實力巡緝以靖地方曹單一路不可空虛閻敬銘所留東治六營扼要設防並於綠營選練馬兵一營以備防剿均照所擬辦理但須切實講求訓練以歸實用毋得徒託空言虛糜餉項致負委任其餘勇丁均卽全行遣散陳貫甲懇求暫歸安頓團眾尙無反側情形仍著閻敬銘遵照前旨隨時察看妥爲安插將此由六百里各諭令知之○己丑諭議政王軍機大臣等張之萬奏僧格林沁由汴赴援蒙城張總愚股匪南竄派兵追剿並程二老砍股匪由楚回豫欲歸皖巢飭令各軍迎擊等摺片所稱僧格林沁統兵至汴與張之萬同赴許防已

於初十日黎明拔隊取道鄆陵扶溝由陳宋各境馳赴亳州進援
蒙城殊慰廛念蒙城危殆已極陳國瑞進攻賊壘不能得手富明
阿到後所擬設法運濟蒙邑城內糧餉及斷賊糧道之處均不知
有無把握僧格林沁見已由汴赴亳著卽迅速赴援以期立解蒙
圍其陳國瑞等軍應作如何調度攻剿諒該大臣必有成竹在胸
苗逆知該大臣大軍到來亦必震懾軍威但苗逆拌力死守且詭
詐百出工於用計僧格林沁督軍進剿務當加意嚴防妥籌進止
以策萬全並著富明阿唐訓方俟僧格林沁到蒙苗逆畏懼之時
卽酌量分兵攻其要害老巢及解散被脅從逆各圩使兵力不聚
於一路令其面面受敵不能被擊旁竄方爲妥善富明阿唐訓方
等前奏招撫練董田端書等圖攻下蔡此時苗逆畏懼或回匿下
蔡及懷遠等處或調其死黨來蒙併力死拒均未可知觀覺蹈瑕

惟在該將軍巡撫等隨時相機以期得手張總愚股匪懾於僧格林沁兵威自遁魯山南召以後節節遁由山僻小路經張曜等沿路追擊見復遁入鄧州境地距老河口甚近卽著張之萬督飭張曜跟蹤追躡如寇蹤入楚卽令踰境會合楚師盡力夾擊以期就地殲除官文嚴樹森亦卽飭令鄂省官軍迎頭截擊毋令此股匪徒得以竄擾老河口等處肆行飽掠其程二老砍等股匪見由楚境復竄光羅總兵李殿元會合兵團疊加剿擊勢將竄由光息遁回皖巢卽著張之萬嚴督該總兵與王文行等軍乘賊情歸奮力痛剿毋稍鬆懈僧格林沁取道歸陳其兩郡防剿各軍應令如何嚴密布置並著隨時妥籌具奏程二老砍等股如同毫巢恐將又爲苗逆羽翼亦須及時先爲掃除以孤賊勢張之萬遵將黑龍江餘丁五百察哈爾馬一千匹畱豫該省得此騎兵自足以資馳驅

第須認真操演俾成勁旅僧格林沁抵毫後卽派老成騎將赴張之萬軍營俾資教練該撫仍當督飭善慶等善爲管帶以資得力將此由六百里各諭令知之○諭多隆阿奏派兵援商山陽失陷見飭由商州進克山陽及督率各軍分剿五鳳山等處賊巢各等語李雲麟係專辦陝南軍務之員見在山陽甫經接仗卽行失利退紮高壩店被匪闖入縣城並未見該京堂奏報著李雲麟據實奏聞多隆阿見派營官藍斯明管帶四營馳往援應著多隆阿卽飭該營官由商州進兵將山陽縣城迅圖克復鳳翔回逆被剿竄至岐山縣之南塬橫水等處難保不乘隙東竄亟應分兵扼剿並著多隆阿飭令派出之營官薩河清所部會合全順溫德勒克西等馬隊迅速援剿以圖聚殲昨據熙麟奏西安敗匪紛竄崇信之神浴河平涼之白水鎮等處請飭雷正綰星速赴援等語此時邠

州一帶賊巢尙眾雷正綰援甘之師尙多阻滯著多隆阿懷遵前
旨飛催該提督節節掃蕩趕緊前進並催令陶茂林一俟鳳翔肅
事迅速督隊赴甘毋稍遲滯多隆阿見已進軍醴泉卽著飭令派
出各軍分投進剿俾陝省及早肅清可以專意剿辦甘肅回匪熙
麟前派辦團之軍功馮元佐赴富平同官招募團勇行抵底店地
方因與該團日程景鵬口角被勇眾格殺身死馮元佐與該團目
究竟因何起釁並應如何將該團目懲辦之處均未據該大臣詳
細聲敘著多隆阿張集馨會同熙麟查明辦理據實奏聞至馮元
佐所募勇眾旣據多隆阿奏稱宜君一帶已無賊蹤卽著多隆阿
飭令該州縣妥爲遣散以免別滋事端正在寄諭間據張集馨奏
稱周有全統帶礮船會同漢陰廳金鑑所捐礮船石泉甯陝團勇
於九月二十三等日攻克茶鎮一摺其詳細情形著劉蓉覆奏核

實具奏所有礮船團勇應如何分撥布置之處並著劉蓉妥爲調度漢郡西北褒沔留鳳等屬甚屬空虛沔縣竄匪賴剝皮見與曹背時敗匪合股竄擾鳳縣方石鋪又竄至兩當縣陝甘交界處所滋擾著劉蓉速撥勁旅分路掃蕩妥籌兼顧並著熙麟於陝甘交界處所派兵堵剿會合陝軍兩面進攻以收夾擊之效留壩被攻勢甚危急著多隆阿懍遵前旨抽撥兵勇前往駐紮以遏賊竄之路陝省各屬民團並著張集馨隨時鼓舞俾資得力將此由六百里諭知多隆阿熙麟劉蓉李雲麟並傳諭張集馨知之○諭郭嵩燾奏到任後體察各路情形等語據毛鴻賓奏廣東信宜逆首陳金缸爲其黨鄭金劉超所誅約期獻城當經寄諭毛鴻賓等以官軍尚未入城崑壽所部各軍未可遽撤鄭金劉超在賊中內訌將陳金缸殺斃獻城歸正是否結實可靠令該督撫等妥籌辦理不

可大意茲據郭嵩燾所奏賊之精銳屯聚東岸大井兩處亦經次第就撫是信宜縣城自可剋期收復惟賊情狡悍鄭金劉超均爲陳逆部下著名爪牙此時該逆內訌自相殘殺殊難恃爲投誠確據儻或敷衍了事該逆未受懲創名爲就撫實則陰蓄異謀一經起事又成燎原之勢毛鴻賓郭嵩燾崑壽仍當乘軍情得手之際懾以兵威勦撫兼施務使地方餘黨不至再萌反側斷不可急於招撫草率圖功該署撫擬於撫局大定後以一軍由信宜進勦廣西之容縣以一軍馳赴陽春新甯勦辦客匪屆時卽著飭令帶兵員弁與粵西官軍會合夾擊將范亞音李木火諸股實力勦除以彰撻伐肇屬土客仇讐甚深見在廣海寨城雖經收復餘匪自當一律蕩除惟土客之案勢不能盡數勦洗總須辦理得宜一勞永逸不使該匪肆行固結亦不至事後再起釁端方爲妥善該督等

惟當乘信宜歲事事機正順之時體察情形妥籌勦撫毋貽後患
將此由五百里各諭令知之○庚寅安徽巡撫唐訓方奏苗逆圍
偏蒙城半載有餘未嘗鬆勁八月以後該逆糾眾數萬以全力注
之城外連營數十掘塹三重爲死困之計參將李南華等激勵勇
練誓死困守屢次乘夜襲撲賊營擒斬無數苗逆畏之深而憾之
愈切必欲得而甘心近聞城內野草浮萍採食俱盡居民餓斃甚
多該參將等守且益堅允宜先行奏懇恩施謹將參將李南華等
分別開列請獎伏乞 聖主逾格鴻慈俯准所請以昭激勵 上
諭內閣苗逆糾眾數萬圍偏蒙城縣城參將李南華等激勵
勇練誓死困守並襲撲賊營擒斬無數實屬異常出力自應先予
恩施以昭激勵參將李南華著以副將儘先補用並賞加總兵銜
都司施紹恆著以參將儘先補用並賞加奮勇巴圖魯名號黃秉

忠著以參將儘先補用並賞加力勇巴圖魯名號知縣賀緒蕃著
俟補缺後以同知直隸州知州補用並賞換花翎○諭議政王軍
機大臣等唐訓方督率水陸各軍滾營前進攻剿蚌埠賊營以冀
牽制圍蒙賊勢惟接仗數次僅平一壘而賊於兩岸均釘巨椿誓
死抗拒我軍猛力進攻徒傷精銳唐訓方見擬設法包鈔斷其糧
道惟宋慶一軍業經撥給陳國瑞調遣克蒙額馬隊又經富明阿
帶領赴蒙兵分力軍該撫請仍令善慶統帶畱豫馬隊來臨助剿
亦是實在情形僧格林沁辦理皖豫兩省軍務自能妥籌兼顧該
大臣見已馳赴蒙毫著卽酌度情形如豫省軍務稍鬆卽將此項
馬隊調赴臨淮以資衝擊抑或由該大臣酌撥馬隊助剿之處均
著妥籌辦理唐訓方當就見有兵力速籌包鈔賊眾之計仍隨時
返顧務策萬全唐訓方已抵蚌埠援蒙之師後路聲勢更壯著富

明阿懷遵疊次寄諭督同陳國瑞設法救援蒙城毋稍遲誤李世忠督兵攻克柏家圩將苗眾悉數殲除附近民圩反正者百有餘處勦辦出力甚屬可嘉著僧格林沁等因勢利導傳諭李世忠乘勝進兵迅攻壽州等處賊巢以分賊勢將此由六百里各諭令知之○左宗棠奏富陽克復後蔣益澧所部各營直擣杭州並調閩字五營與楚軍前營渡江會勦漸偪清波鳳山兩門康國器魏喻義進取餘杭蔣益澧派副將劉清亮率六營助之僞歸王鄧沆明僞聽王陳炳汶僞潮王汪海洋等於杭城要隘修築卡壘復嗾餘杭踞逆謝添義等併力死守八月二十五日蔣益澧令高連陞帶所部各營進攻十里長街洋將德克碑等率各營接應水陸諸軍均抵濠邊拔椿開礮踏毀街口賊壘一座殲擒壘賊三四百名城內悍賊萬餘蠶擁而來高連陞等俟賊偪近揮兵突擊斃賊多名

賊敗入城二十六日蔣益澧飭高連陞等乘勝進紮十里長街六和塔萬松嶺一帶先占地勢俯瞰杭城而自率徐文秀等赴東嶽廟察看路徑諸將乘賊不覺立破賊卡三座斃賊數十名餘黨浮水竄去九月初六日城賊萬餘由江邊饅頭山等處分路來撲高連陞率水陸各營分路迎敵往來馳突斃悍賊數十名賊大敗官軍追至饅頭山斬馘三百餘名逆首鄧沆明等率黨回撲高連陞等督勇迎擊賊始狂奔入城十三日該逆率黨於楊家橋紮壘一座蔣益澧飭徐文秀率勇士乘夜平之殺賊百餘名復乘勝過河攻破對岸小壘一座擒斬又數十名據生擒賊俱鄧逆在饅頭山受傷逆首謝添義已在餘杭被礮轟斃其攻餘杭縣城等軍八月初九日魏喻義等各率所部分路前進連破花牌樓牛背嶺栗樹村諸卡卡賊遁去歸併青山賊巢十二日魏喻義羅大春等分由

餘杭臨安各路前進破賊卡十餘處進擣青山等處賊巢先將附近賊匪擊走復分兵繞出壘後夾攻賊眾驚潰擒斬壘賊殆盡青山一帶卡壘悉平餘賊回竄餘杭八月三十至九月初十等日魏喻義等屢擊賊於石門等處敗之其餘杭東南一路賊壘最多而近城之寶塔山文昌閣兩壘尤爲必爭之地八月十八日劉清亮率營攻城南賊壘以分其勢康國器率營急攻寶塔山賊壘康熊飛等分路包鈔一鼓而拔殺斃悍賊多名二十日汪逆從杭州率黨上援康國器等擊敗之二十一至二十六等日官軍連破賊卡斬擒甚多九月初七日康國器派軍於文昌閣傍設伏約劉清亮等營分攻餘杭南岱門等處賊卡以牽制之自率親兵轟擊文昌閣逆壘鏖戰多時斃賊無數吳光亮伏軍齊出夾攻立將逆壘攻克逆黨盡殲城賊出援均被擊退

臣查杭州餘杭逆首惟鄧洸明

汪海洋最爲兇狡陳炳汶等次之賊以杭州爲老巢以餘杭爲犄角均盼嘉興湖州之援而嘉湖來杭之路又在餘杭故官軍必先克餘杭扼截嘉湖來路而後可合圍杭州見在蔣益澧一軍偏紮鳳山清波各門僅能扼其西面其餘杭一城雖已圍東南而北路無重兵駐紮兩城之賊仍可往來自如臣本擬移紮富陽後親赴餘杭酌量進紮旋因青陽圍解皖賊有竄浙之勢不得不暫駐嚴州以期上下兼顧計浙軍援皖者馬步一萬有餘攻杭州餘杭者水陸馬步二萬有餘此外如錢江東岸以及富新等處在在宜防見隨臣駐嚴之軍不過千餘僅有巨股竄入恐多罅漏當即飭三沐移營守徽屬祁門王開琳分防徽屬之漁亭屯溪而令劉典移軍東向兼顧浙境據魏喻義稟報湖州之賊由武康而來似有以全力援杭之勢已飭蔣益澧康國器魏喻義等痛剿援賊並飭富

陽新城分水各營加緊防守劉典見抵績溪已派營進剿昌化於
潛之賊臣惟有隨時相機調度務期堅城速克不敢稍失機宜又
奏臣以徽州各屬兵單恐賊仍由石太旌德糾股內犯當飭劉典
一軍仍由景德鎮清華街一路回顧徽浙之防八月初一臣劉典
率所部各營行抵休甯分屯漁亭萬安街等處初七八等日青陽
之賊由香口琅田竄至黃嶺一帶圖犯祁門初九日王開琳等率
軍分路前進初十日馳抵鴉坑見該逆列陣田隴而栗樹街尾賊
甚多當令賀章彬等分投迎擊王開琳飭鄧榮達率馬步繞扼蘆
林橋截其歸路斃賊約數百名追至琅田沿途斬馘頗多是役共
斃賊千名生擒一百七十餘名內有偽朝將陳矮子等當經訊明
正法祁門北路肅清劉典聞賊圍青陽急與王開琳等會議出嶺
進剿石太探聞太平古逆率黨竄至橫潭郭村等處劉典卽派張

聲恆等各營進駐黟城賊知黟縣有備遂改向箬嶺奔竄二十一日竄至徽州之北許村地方前隊距潛口不遠劉典立率各營往勦並派都司劉敬廷先赴潛口知會總兵唐義訓率師來會二十三日該逆復竄至許村一帶分股由績溪擾及歙東石門等處二十四日唐義訓出隊豐口劉典直擣許村賊巢令知縣楊詠春等分兩路進攻槍礮排擊陣斬賊目一名賊潰我軍兩路追殺約斃賊五六百名生擒二百餘名餘賊越嶺而逃據生擒賊供逆目僞金王僞東平王僞黃天將林天將等仍欲由徽州竄過江西否則由昌化入浙等語二十五日劉典移軍徽城次日卽與唐義訓分路進勦橫村口石門藍田等處股匪行抵該處賊已聞風竄歸旌德賊巢據劉典王開琳稟報賊之大股有由甯國竄廣德者有由甯國入浙者均聲言欲來援杭恐皖事鬆而浙事日急石埭太平

旌德各城雖有賊踞人數尙不甚多揣度賊意似欲牽綴上游官軍使不得悉銳東向見在曾國藩檄鮑超一軍由蕪湖進兵埭南陵涇縣等處檄江忠義席寶田李榕喻吉三朱品隆等軍由青陽池州進兵攻石埭太平旌德等處兵力甚厚如果嶺外肅清則皖軍攻廣德建平以扼東壩浙軍由昌化於潛孝豐臨安各路進規湖州兩路聲氣聯絡漸逼漸近庶可制其鴟張此次劉典援皖援江復由江右回顧皖浙各將士勞瘁異常王開琳老湘營固守祁門均於大局有益應由臣分別存記彙案保獎上諭蔣益澧所部直擣杭州連破賊卡奪據寶塔山文昌閣險隘見在杭州餘杭逆杭縣城亦連破賊卡奪據寶塔山文昌閣險隘見在杭州餘杭逆首以鄧洸明汪海洋爲最而陳炳汶次之其逆謀以杭州爲老巢以餘杭爲犄角均盼嘉興湖州之援嘉湖來杭之路必由餘杭自

應先將餘杭攻克遏賊來路以期合圍杭省餘杭險要已得不難收破竹之效著卽飭令魏喻義等迅圖攻拔湖州援杭之賊由武康一路而來左宗棠卽飭蔣益澧等實力痛剿無任句合見在嘉湖之賊均併力趨援杭郡李鴻章前有派兵攻嘉善之奏若由嘉善平湖以攻嘉興以太湖水師襲湖州爲攻瑕擣虛之計必可得手卽不能攻克亦可牽制該逆使不得併力於杭州則蔣益澧等可以一鼓攻克二城便可規取嘉湖節節掃蕩該撫卽相機督剿以分賊勢另摺奏劉典等軍截剿皖南賊匪疊獲勝仗訊據生擒賊供逆目僞金王僞平東王僞黃天將等欲由徽州竄過江西如不能竄過卽由昌化入浙劉典見已移軍徽城與唐義訓分剿橫村口等處賊匪該逆遁歸旌德見在曾國藩檄鮑超一軍由蕪湖進兵埭南陵涇縣等處檄江忠義等由青陽池州進兵攻石埭太

平旌德等處左宗棠擬俟嶺外肅清皖軍攻廣德建平扼東壩浙軍卽由昌化於潛孝豐臨安各路以規湖州兩路聲勢聯絡遙合長圍漸逼漸緊東南大局自可日有起色著曾國藩卽飭鮑超等軍實力進攻務將皖南各城一律肅清不得任令回竄江西並會合浙軍力圖攻剿廣德等處徽防緊要左宗棠飭劉典等妥籌防剿不可稍爲疏失又片奏王文瑞請假省母等語王文瑞係寶缺道員此時軍務緊要准其歸省已屬格外推恩著左宗棠卽飭該道趕緊回營以資得力將此由六百里各諭令知之○予浙江陣亡參將朱連彪等祭葬世職○辛卯諭議政王軍機大臣等御史華祝三奏撫臣引疾假期將滿請令照舊供職一摺據稱沈葆楨年甫四十有餘其病非難速痊所以力求引退者特以協餉用人兩端與曾國藩意見不合而營員乘間伺隙飾非亂是以沈葆

楨知難而退見在該撫假期將滿諭令毋庸固辭並令該二員遇事熟商卽意見偶歧不妨各據一是請旨施行等語沈葆楨與曾國藩意見不合朝廷早有所聞此奏不爲無因曾國藩辦理東南軍務需餉孔亟而沈葆楨值地方凋敝之餘心存撫字或致蠲緩多而協餉未能如數至用人一項沈葆楨爲地方大吏甄覈不得不嚴而曾國藩因軍營需才葑菲無棄亦恐有耳目難周之弊該御史所稱此輩一經得志顛倒是非任意播弄亦所不免在該大臣等事屬有因初非自便其私惟天下事往往以小嫌而誤大局不可不思曾國藩沈葆楨皆賢能卓著公忠體國之臣如果尙有畛域未化各懷意見東南民生何日可冀朝廷尙安望二臣之共濟艱難耶經此次訓諭之後沈葆楨於曾國藩軍營協餉苟可設法卽當盡力籌措並著該撫於假滿後卽行銷假任事勿稍耽延

曾國藩於沈葆楨曾經甄劾前來投效之員亦當留意屏斥裁汰
勿開小人倖進之門彼此函商其歸一是以古人廉頗藺相如寇
恂賈復爲法同心其事無貽朝廷南顧之憂以全終始而保令名
於二臣有厚望焉原摺均著鈔給閱看將此各諭令知之○壬辰
諭議政王軍機大臣等劉長佑奏遵籌直隸抽練營兵酌募勇丁
以重畿輔一摺軍興以來各省募勇剿賊實因兵力不敷一時權
宜之計而楚省勇丁尤所向有功直省前因剿賊喫緊特將該督
調任畿輔並節經諭令該督催調所募楚軍前來以資應用固以
楚軍所至剿賊尙能得力亦體該督廉頗用趙之意必使其兵將
相習以盡所長而速就功若地方業經平靖爲畿輔屏藩議立久
遠之法則改設營鎮因地制宜仍當一切俱從標兵規制方爲妥
善不准盡用楚勇南北風土不能相習日久非宜卽就地招募成

軍一切俱用勇營制度亦恐諸多窒礙直省見在雖已肅清恐各屬地方伏莽尙多豫捻陝回亦須備豫鎮遏劉長佑新募南來楚勇自不能不准畱數營以資調度隨時防剿之用俟直省營務整飭之後楚軍遠戍久而思歸即可隨時陸續量爲遣散若以選募新軍計及久遠仍當就地取材五方氣類各有所宜地勢人情亦皆各有所習燕趙民俗古稱雄勁果有善於用兵之人加以簡練詎乏可用之才從來善用兵者尤須所至之地皆能善用其民轉移強弱乃爲其用不窮該督前奏軍制分數摺內所稱欲以南省營制教練北省之兵最爲善策惟直省營伍廢弛已久本地練勇積弊更多此時就地選募新軍亦必須畱楚省將弁以資教演該省此次奏稱增練精勇或募楚軍或卽本省挑選原無成見卽所稱以書生團練殺賊親黨鄰里所與立功不能不酌用楚軍亦屬

實情朝廷破格用才惟恐倚任不專以資宏濟但茲事體重大總期如何有益如何經久無弊方可盡善劉長佑仍當精思熟計以圖萬全治法尤在得人並隨時隨地留意人材俾得相與有成期於有備無患至所稱再於燒鍋棉花等項以及天津獲鹿商賈輻輳各口岸試辦釐捐之處各省釐捐係屬萬不得已之舉南北省分地方情形各有不同畿輔捐釐向來未經試辦恐一經舉行所獲無幾而流弊繁興怨咨頓起有傷元氣不可不加慎重天津一處係屬向有釐捐該處商賈較多其應如何抽收之處卽著會同崇厚妥籌辦理將此諭令知之○諭前因侍郎薛煥奏請飭直隸練兵四萬各直省分籌固本軍餉酌量數目奏明辦理當經寄諭該督撫等酌籌撥濟嗣據毛鴻賓奏直隸添兵籌餉窒礙情形復經諭知劉長佑就地方情形妥籌定擬茲據劉長佑奏遵籌全局

擬請抽練營兵酌募勇丁以重畿輔惟以此項軍餉責成十八省不獨瘡痍省分自顧不遑卽完善之區亦各日形支絀與其多派而徒有其名不如少派以期覈實擬於廣東釐捐項下每月提銀一萬兩江蘇江西福建兩湖山東山西四川河南各省每月提銀各五千兩其餘各省應免籌濟並將該督到任時指撥各省協餉一概停止等語所籌尙屬妥協直隸屏衛京畿見在宋憬詩全股殲除正宜乘此休暇整頓營伍以重畿輔藩籬所有添設營鎮增補新軍需餉尤爲緊要著各該督撫等按照所奏按月如數籌撥卽與京餉搭解部庫以便由部撥解直隸省以應要需而資拱衛如有遲延卽照貽誤京餉律議處該督撫等務當迅速籌撥毋少遲誤自干罪戾將此由五百里各諭令知之○諭多隆阿奏鳳邠各路連日獲勝及漢南髮逆竄陷盤屋各摺片陶茂林一軍自解

鳳翔圍後復將府東賊巢一律掃蕩八旗屯各處窩洞零匪亦經
搜殺無遺餘賊向汧陽老崖一帶奔竄其竄至岐山另股回逆復
經蕭河清等漸次剿滅是陶茂林一軍正可乘勝將汧隴餘匪一
鼓蕩平馳赴甘省著多隆阿卽行飭遵無少延滯雷正綰見克拜
家河老巢擬進攻永壽東路賊巢俟永境肅清移營前進見在甘
省望援甚急西安敗匪復紛竄崇信平涼等處勢且與甘肅回匪
聯成一片該大臣務當懷遵疊次寄諭飭令雷正綰一軍迅速掃
蕩而前赴甘助剿毋得節節阻滯致誤師行並飛檄曹克忠進攻
白吉原之軍迅克堅巢以便雷正綰赴甘之師通行無滯漢南髮
逆由佛坪一路竄出新口峪攻陷盤屋縣城該處距省較近設被
該逆久踞爲患滋深且恐漢南各逆陸續上犯勾結回匪則邠乾
各路官兵又須回顧雷正綰陶茂林赴甘之師或轉因此阻滯貽

誤匪輕多隆阿見檄穆圖善姜玉順兩軍會同溫德勒克西馬隊
力圖恢復並卽日親督各營由興平一路前往督剿實爲目前要
著卽著該大臣迅速進兵收復縣城肅殲醜類使興漢諸逆不敢
再行上竄與回匪勾結鴟張方爲妥善此次髮逆假冒官兵由南
山出竄何以始終未據各路稟報著諸大臣卽行查明參奏前諭
劉蓉就見有兵力或進紮青石關或由甯羌進規褒沔並令李雲
麟馳紮興安與劉蓉分路進剿以牽賊勢見在逆氛紛竄山陽盤
屋等處肆出蔓延希圖分我兵力致令兼顧不遑賊情殊狡劉蓉
等務當懷遵前次諭旨迅圖進兵使該逆有所顧忌不至紛竄爲
患則山陽等處之賊自可次第剋平而多隆阿大軍亦可分兵進
剿漢南與劉蓉等共收夾擊之效盤屋離省不遠所有省垣防剿
機宜著張集馨會同德興阿妥爲布置勿稍疏虞西安駐防營務

廢弛亟應隨時整頓多隆阿見已督軍在外所有西安將軍印務
卽著暫交德興阿就近兼署以重旗務將此由六百里諭知多隆
阿德興阿劉蓉李雲麟並傳諭張集馨知之○癸巳諭內閣朕奉
慈安皇太后 慈禧皇太后懿旨本日祁寯藻倭仁李鴻藻奏
釋服逾期請嚴敬肆之分屏黜浮靡以新聖學固聖德一摺防微
杜漸具見惻忱皇帝登極以來節經詔諭中外崇實黜華以敦邇
治初當釋服之初吉禮舉行誠如祁寯藻等所奏帝心敬肆於此
分卽風氣轉移於此始一切玩好遊觀興作嗜好之開不可不防
其漸此中安危治亂之幾其端甚微而所關甚巨見在皇帝雖已
釋服痛念 山陵未安民生未奠各省地方軍興日久物力耗絀
正我羣臣上下艱難共濟之日豈宜稍涉恬熙致忘無逸之戒矧
皇帝冲齡在位知慧漸開尤應遜志典學時以憂勤惕勵爲心其

於逸樂 以及玩好遊觀興作諸務一切嚴加屏斥卽內廷服御亦當概從節儉爲天下先祁寯藻倭仁李鴻藻同心啟沃其各朝夕訥誨陳善閉邪日以詩書牖迪養成令德以端治本而懋躬行祁寯藻等原摺著交弘德殿用資省覽○曾國藩奏官軍攻克江東橋上方橋後金陵城東尙有數隘未下夾河而壘戒備甚嚴近城者曰中和橋雙橋門七甕橋稍遠者曰方山土山曰上方門高橋門迤南則爲秣陵關以至博望鎮係金陵之外輔曾國荃令蕭慶衍彭毓橘蕭孚泗等擇小河紆曲之處架橋結筏謀分隊伍東渡立營賊已先踞河東築數壘抗拒蕭慶衍旋派朱吉玉等更在西岸上下游各修三營爲進兵之計賊復排列洋槍與我軍對壘轟擊九月二十日李祥和蕭慶衍等各率銳卒分從上下游渡河破五土壘殲賊頗眾俄而城賊壘賊蠭擁來爭蕭慶衍一面搶築

營寨一面揮軍環進將賊擊走遂成東岸之壘二十二日賊分道並出陳湜等率師東渡直擣左路都司熊桂林死之我軍鈔過七鬻橋後破賊一壘駐兵其中使雙橋門以東不能通城賊之氣蕭慶衍更率所部徑取中路冒輝日等死之各將士憤極速進賊乃退竄蕭慶衍以騎隊邀斷歸路遂克上方門高橋門雙橋門諸石壘而右路方山土山之賊經熊登武等分道馳勦亦各棄壘而奔於是七鬻橋踞賊惶遽欲遁蕭孚泗等八營扼東岸之後李臣典等五營遮西岸之前正謀前後合圍一鼓併下城中忽出大股來援張毓明等又死之蕭孚泗彭毓橘急督各軍擊退援賊仍復偪壘環攻至二十四日夜令死士前往縱火賊眾衝煙突出乃克斯壘屠戮無算其秣陵關南爲博望鎮賊在該鎮設卡二壘八月十八日朱南桂約朱洪章等五營進小丹陽議襲博望十九日昧爽

各軍齊抵博望卡下卡賊負固死守槍礮橫施猝不得進朱洪章
俟賊稍懈昇巨礮至左卡轟斃無算武明良用火箭攢射右卡羣
賊駭懼撲火爭竄我軍乘勢毀卡而壘中之賊傾巢驟至朱南桂
往來猛撲朱洪章武明良潛率哨勇繞出頭壘踰牆而登賊沸返
顧羣壘已易官軍旗幟錯愕不知所爲朱南桂等遂縱兵驅賊至
長流觜地方墮河溺斃者強半乃引軍回駐博望曾國荃以博望
旣得則秣陵關之勢孤七寶橋旣得則中和橋之勢孤二十五日
派趙三元伍維壽共帶馬步九營南略秣陵關又派陳湜黃潤昌
分帶八營出七寶橋之西與熊登武等會師於中和橋一戰克之
秣陵關之賊見我馬步馳至卽棄壘奔潰各營追及河干斬賊後
隊二百餘人自是紫金山西南無賊巢矣二十七日曾國荃親督
蕭慶衍等往勘孝陵衛地勢將欲分營移紮朝陽太平兩門各出

賊搦戰蕭慶

提率兵分擊蕭孚泗李臣典各率所部傍城鈔

入賊酋僞護王陳坤書指揮督陣冒國荃伏槍隊於山麓伺其近而擊之該酋中槍墜馬賊陣遂亂俘執百數十人臣查金陵一城面面布置據有重險自克九洲江東橋數隘西南一面已爲我有茲又克七甕橋秣陵關等隘東南一面並爲我有見令蕭慶衍全隊進紮孝陵衛經營城北漸成合圍之局此次出力人員應俟續立功績彙案請獎其力戰陣亡人員俟查明另行請卹又奏查大江南岸甯國太平以東久爲賊藪彭玉麟親督水師會合王可陞等陸師於九月初二日收復高淳縣城東壩賊黨黎立新等亦卽友青乞降十月初二日收復高淳縣城東壩賊黨黎立新等亦卽具稟納款願爲內應彭玉麟知東壩一股已無固志商同鮑超率師疾進楊岳斌亦帶師船來會旋於初七日攻克東壩幸仗天

威得此要隘不特皖南可冀肅清卽東至蘇州北至金陵攻取亦較有把握又奏僞匡王賴汶鴻竄踞太平僞奉王古澥賢分踞石埭旌德廣德等城聚黨出掠久貽皖南之患自賴汶鴻爲涇軍所敗遁入甯國而太平遂爲古澥賢分地青陽解圍後該城守將朱品隆疊據古澥賢遣人通款請以四城獻部眾之在石太者四萬有奇其在旌廣者亦三萬有奇悉願反正朱品隆呈明臣處議將廣德撫局以鮑超任之旌德撫局以易開俊任之石埭太平撫局則請自任之九月十九至二十三等日朱品隆兩派營弁馳赴石埭宣諭降眾先繳軍械次令薙髮分屯城下待命二十八日親督易潤壇等分帶四營入城受降並調太平江老三降眾歸併石埭挑畱山步千人編立營哨仍交古澥賢管帶責令立功贖罪餘則由臣給資遣散是日旣復石埭縣城遂於次日收復太平城池調

諭吉三所部三營守之二十七日易開俊引軍進次旌德城外踞
逆申法喜聞風先遁餘黨舉城歸降易開俊安撫城中盡遣降卒
三千餘人卽分所部兩營守之臣查古澧賢爲賊中巨擘本屬罪
不容誅一旦翻然悔悟自拔來歸不煩一兵而三城並下不邀寬
典則無以開羣盜自新之路而廣聖朝如天之仁合無籲懇

天恩賞給古澧賢遊擊虛銜頂戴以昭激勸其部下頭目及經辦
招撫各將士可否容臣查明請獎之處出自聖裁再廣德一城

臣飭鮑超部下宋國永往辦招撫事宜旋有叛黨江合義申法喜
等下竄尙恐事多中變見在水陸各軍已克東壩鮑超將由建平
進剿廣德該州剿撫事宜已檄令相機辦理李鴻章奏臣因蘇城
東南兩面經程學啟等布置扼紮均屬穩密而忠逆糾眾竄擾蘇
錫之交前有李鶴章所部各軍追剿攻蘇各營正可暗抽精銳由

蘇城西北橫出賊後使城賊與援賊氣阻膽寒當飭程學啟戈登
於九月十九日挑派槍礮隊伍先攻齊門外蠡口賊營以通要路
是夜程學啟等帶隊銜枚急進二十日候選道潘曾瑋亦督礮船
民勇來會先派劉士奇等各出隊漕莊口牽制城賊程學啟揮軍
猛進賊營開礮抗拒戈登連開炸礮傷賊多名程學啟督軍四面
環攻賊眾不支立將逆營攻毀斃悍賊千餘人戈登卽督兵駐守
程學啟督隊進逼齊門適城逆糾眾來援總兵陳有昇率兵禦之
賊眾披靡追斬千餘人程學啟戈登察看黃埭虎邱之交賊紮四
營最扼要隘會商黃翼升潘曾瑋各帶水陸隊伍於十月初一日
往攻戈登派克根木攻黃埭之右自督槍隊攻黃埭之左程學啟
派陳有昇等攻其南黃翼升督師攻其西潘曾瑋亦率民團礮船
隨剿逆首萬國鎮糾眾突圍程學啟戈登督軍施放開花礮乘勢

越濠而入手刃悍賊多名黃翼升令水師夾擊賊眾逃竄各軍圍殺殆盡當毀賊壘四座擒斬二千餘人生擒僞天將萬國鎮一名僞忠王李秀城糾黨進踞蘇錫之交僞侍王李侍賢分踞無錫西北惠山一帶連營五六十里抗拒我軍九月十六日該逆竄踞芙蓉山二里許排隊紮卡周盛波督小隊擊走之連破賊卡二道擒斬二百餘人二十四日賊眾萬餘分撲緱山營盤郭松林先期設伏追逆眾圍營郭松林自後突出賊駭而奔自相蹂踐死者無算是日忠逆由后宅出撲大橋角黃中元帶隊擊走之擒斬五六百人踏毀后宅南塘打鼓橋賊營十一座二十七日忠侍各逆由坊前梅村等處排隊數十里欲撲緱山李鶴章與劉銘傳等會商分路滾營前進派周盛波由興隆橋進紮與劉銘傳合攻坊前賊壘張樹聲由中安橋進紮與郭松林合攻梅村芳塘橋賊壘李鶴章

自督洋槍隊分投策應二十八日周盛波帶隊至興隆橋逆眾踞橋抵守周盛波擊走之斃賊甚多追至鴨城橋遇坊前竄賊又斬獲百餘名二十九日督營分紮鴨城橋侍逆率黨數萬來撲周盛波調隊堵擊知會郭松林由梅村進剿忠逆先已竄入安鎮僞武王汪有維分竄緱山郭松林督隊奮戰張樹聲亦移營進紮中安橋張樹珊由太平橋鈔擊生擒僞主將韋城篙一名擒斬餘賊無數賊遂潰退郭松林乘勝進攻梅村西倉賊巢賊復分股迎拒郭松林用洋槍連環排擊立將梅村賊壘十餘座踏平生擒僞軍師李生香一名及各賊目數十名擊斃逆首唐政才擒獲賊眾千餘名淹斃殺斃五六千人忠逆由茅塘橋自帶悍賊數千來援副將吳建瀛分攻西倉賊壘兼顧左路郭松林親督槍隊衝進吳建瀛攻踏西倉賊營八座又會攻茅塘橋破賊壘三座忠逆死拒石營

槍礮甚密郭松林撲牆受傷遂卽收隊李鶴章解到生擒僞軍師
李生香訊據供稱忠逆因金陵緊急將救金陵先救蘇錫翼調各
路逆匪速解蘇圍又披獲忠逆致無錫賊目黃子澐陳坤書各函
內有蘇杭二處不穩金陵不能解圍常錫亦成瓦解等語忠逆在
賊中謀略較長彼以金陵蘇杭三城皆有官兵圍困而蘇州尤爲
中權關鍵故糾眾死爭兩月以來未嘗少休屢挫之餘復率各逆
圖救無錫臣督飭將士先以堅壁勿戰挫其氣繼以滾營並進遏
其鋒連日疊受懲創兇燄漸衰臣已飭李鶴章劉銘傳等穩紮穩
進並令程學啟戈登由許關一帶鈔襲蘇錫交通之路以收夾擊
之效俟此股援賊勦退然後分攻蘇錫當可漸次得手又奏查水
師將領黃翼升前經曾國藩調赴臨淮見在該員自帶二營來往
蘇錫之交四處策應李朝斌所統太湖水師船隻較少專顧吳江

之九里湖及蘇城南面之黃天蕩等處並隨時入太湖雕剿賊勢
過重地面太寬不敷分布准楊岳斌彭玉麟咨稱前派助援臨淮
之丁泗濱等戰船亟須飭調出江協剿東壩催令黃翼升卽率所
部四營趕至臨淮接防等語查各路賊勢以蘇錫爲最多況蘇城
六門已圍無錫官軍疊獲勝仗攻剿甚緊若於水師中抽出一枝
則罅漏甚多不獨蘇錫難攻且恐忠侍各賊乘虛內竄黃翼升淮
揚水師應請暫畱協攻俟蘇州無錫克復再分帶數營前往臨淮
上諭議政王軍機大臣等金陵官軍攻克上方橋高橋門雙橋
門土山方山七寶橋二十餘壘並攻破博望鎮二卡七壘將中和
橋秣陵關一併攻克擊敗出城抗拒之賊曾國荃擬令蕭慶衍進
紮孝陵衛經營城北漸成合圍之局辦理甚爲得手著卽行令曾
國荃督飭將士實力攻剿毋稍鬆勁古澥賢舉眾就撫收復石埭

太平旌德三城朱品隆將降眾挑畱千人編立營哨交古澧賢管帶責令立功贖罪著卽妥爲撫馭仍隨時畱心防範不可稍涉大意占澧賢爲賊中巨擘本屬罪不容誅旣係自拔來歸尙可予以自新以期被脅各匪聞風效順本日已明降諭旨賞給遊擊銜並准將該部下頭目及辦理招撫各將士查明獎勵廣德招撫事宜仍須審慎辦理見在水陸各軍已復東壩鮑超卽將由建平進剿廣德東壩爲金陵西南水陸要衝廣德爲皖浙門戶與湖州毗連一經得手則賊之險要已失著曾國藩卽飭令鮑超迅速攻克廣德州並著左宗棠分撥兵勇會同鮑超所部進取湖州以斷杭城賊匪援應其東壩各軍仍由曾國藩飭令進取溧水溧陽金壇等處以期與李鶴章規取蘇郡之師漸相聯絡如此面面圍逼俾賊兼顧不暇自可勢如破竹蘇州官軍攻克蠡口黃埭等處賊營無

錫官軍攻剿安鎮梅村西倉茅塘橋等處援賊連獲大勝李鴻章見飭程學啟等由潯關一帶鈔襲蘇錫交通之路以收前後夾擊之效著卽飭令該營將士將此股援賊合力剿退以期分攻蘇錫漸次得手見在官軍屢次獲捷一切攻剿事宜尤須慎之又慎不可恃勝而驕李鴻章務當督飭諸將穩紮營盤謀定後進毋稍輕率李鴻章所部小師本形單弱分路防剿不敷應用見當蘇錫攻剿喫緊之時黃翼升所統水師船隻准其畱於該處以資得力僧格林沁見已由豫赴皖唐訓方分軍大小蚌埠以圖懷遠潁州兵練亦攻破朱滑孜賊圩淮北各營聲勢聯絡軍威較壯李世忠見在進軍姚家灣以圖下蔡直搗苗逆老巢自可掣動蒙城賊勢著曾國藩加意撫循多方激勵俾李世忠盡力攻拔該逆老寨令苗黨眾心離散進退失據庶官軍易於進取石逆餘黨竄擾楚南道

州江省西南一帶空虛此時皖南一帶漸次肅清江忠義一軍正可還駐饒郡同領江西席寶田一軍見赴贛州著曾國藩卽飭令該員嚴防以臨毋令楚南賊匪竄入江境是爲至要將此田六百里各諭令知之○諭吳棠奏蒙軍進紮渦南繪圖呈覽並擒匪出擾徐境情形一摺陳國瑞一軍在王黨以下奪獲賊船由淺水處所躡過河南岸搭造浮橋卽親督馬步各軍過河與賊力戰搶築新營包鈔賊之東南兩面復又派撥馬隊鈔襲後路運糧之賊見在河南連營二十餘座副將張從龍夜擊賊營已至蒙城南門濠邊其南岸連營於賊陸路糧道已能窒遏所辦尙爲認真惟西南兩面尙無布置城圍未能遽解僧格林沁刻下當已到毫係由蒙之西北一路前往富明阿等軍到蒙後兵力較厚卽可調撥由西南面進剿○陳國瑞一軍會合夾擊斷賊糧道力解蒙圍臨渙一

軍與賊相持李大箇子等匪忽又竄擾及於銅城偏近徐城道員
朱善張派兵堵守姚廣武分隊回援總兵鶴齡等水陸各軍亦各
分投防剿卽著吳棠督飭各軍實力扼剿毋令蔓延勾結爲患本
日曾國藩片奏李世忠進軍姚家灣以圖下蔡直擣苗逆老巢唐
訓方亦分軍一小蚌埠以圖懷遠潁川兵練攻破朱滑孜賊圩潁
郡西面漸已肅清李世忠此次協助二軍進剿頗能認真出力其
進軍以圖下蔡賊巢正與前次寄諭相爲脗合僧格林沁等卽當
隨時激勵用之俾與富明阿陳國瑞等相爲策應以資得力唐訓
方爲富明阿等軍後路聲援兼顧臨淮此時分軍以圖懷遠使逆
黨到處受敵面面不能兼顧所籌亦合機宜均卽乘機迅速辦理
各處練圩當此僧格林沁到皖官軍得手之際其爲賊裹脅者尤
必羣思反正並著該大臣將軍督撫等迎機招徠以孤逆勢攻剿

更宜得手吳棠繪呈軍營形勢圖畱覽將此由六百里各諭令知之○予江南陣亡副將吳世仁知縣蔡良杰等祭葬世職○甲午諭內閣前因直東等省交界處所賊蹤紛竄靡定特命劉長佑督辦三省剿匪事宜茲據劉長佑奏稱直東豫三省交界地方見已肅清請撤去督辦等語直東股匪經惲格林沁會同劉長佑閻敬銘剿除殆盡即照劉長佑所請毋庸督辦三省剿匪事宜直隸山東河南交界地方如尚有零匪出沒劉長佑仍當會合剿辦不得以見無督辦之責稍存諉卸閻敬銘張之萬亦不准因撤去督辦遂存畛域之見直隸總督久在軍營地方一切公事均關緊要著劉長佑察看如果省外布置業已周妥即行回省任事將察吏安民詰奸弭盜一切應辦事宜實心實力認真經理以副委任○諭議政王軍機大臣等惲世臨奏髮逆由粵竄楚截擊大勝餘匪散

走粵黔見籌防剿情形一摺。逆竄入富賀界內與廣東相距不
過二三百里。見在該省兵力萃於肇慶高州。若此股乘虛直入廣
東腹地。深屬可虞。憚世臨見飭臬司張運蘭等軍由宜章橫出連
山扼賊東趨之路。卽著毛鴻賓郭嵩燾督飭張運蘭等實力扼截。
隨時與楚邊各軍互相聯絡。實力剿洗。憚世臨嚴飭陳士杰王永
章等軍力退回竄毋稍疏虞。至分竄黎平之賊。憚世臨已飭周洪
印等分守沅靖各隘。相機堵剿。勞崇光張亮基務當督飭在事員
弁迅速會合楚師。力圖掃蕩。包毛仙一股雖經金太文等圍剿。疊
勝而賊勢未衰。並著勞崇光等嚴飭金太文等乘勝進兵。盡殲醜
類。毋畱邊陲之患。李逆屢敗之後。兇焰漸衰。此次若不得逞。志於
東。必將歸併潯州。與黃逆合股。著張凱嵩速派得力將弁迎頭截
剿。期與黔楚各軍三面兜圍。迅圖戡事。不得稍有遲誤。將此由六

百里各諭令知之○乙未諭議政王軍機大臣等張集馨奏陝省各路逆匪分竄妥籌布置省城安堵漢南團勇截賊獲勝請令蔣常垣籌費練團各摺片前據多隆阿奏盤屋失陷該將軍已飛檄穆圖善姜玉順兩軍前進而自率各營由興平一路督勦茲據張集馨奏多隆阿已於盤屋城外紮營圍繞三市賊不得遁此股逆匪輕裝遠馳人數無多盤逆亦在其內如能全取聚殲即可除一巨憝著多隆阿卽督飭穆圖善等剋期攻拔無任一名漏網喪汚雷鳳節節空虛並著多隆阿派兵聯團實力守禦以免逆匪乘虛竄入山陽失守以後未據李雲麟奏報邊經諭令該京卿督兵攻克著卽實力進攻俟克復後由興平一帶進剿毋再延誤該京堂以知兵自許朝廷不惜破格錄用乃前軍甫出卽已潰散若不力圖振作自問當得何罪劉蓉身膺疆寄責有攸歸見在漢南一帶

賊勢猖獗該撫自川啟程已逾數月尙未抵陝若必俟三省會剿始由巴州前進則陝南地方日見糜爛賊勢日見蔓延以後更難著手劉蓉當懷遵前旨趕緊部署入陝相機剿辦俾各路官軍有所繫屬不至互相觀望貽誤事機方爲不負委任盤厓距省較近省垣防範仍不可稍爲鬆懈著張集馨會同德興阿認真辦理興安紳士蔣常垣等稟請於安康漢陰適中之地設局攤糧辦團既係該紳士等敵愾情殷保衛鄉里著准其設局興辦惟按畝攤糧須歸公正紳耆經理方免抑勒侵吞諸弊該署撫仍當嚴飭該紳士等不得假公濟私致滋擾累至刊發木質關防一節與體制不符礙難照准將此由六百里諭知多隆阿劉蓉李雲麟並傳諭張集馨知之○丙申諭議政王軍機大臣等唐訓方奏官軍進剿壽州疊獲勝仗剿撫兼施情形一摺李世忠一軍由南岸進兵業經

攻克柏家圩收撫民圩百餘處茲復移師前進距壽州十餘里兩月之間攻克逆圩三十餘座殺賊四千餘名收撫投誠各圩十餘處實屬奮勉出力著曾國藩卽飭李世忠速將壽州攻拔三面飭奇蔣凝學成大吉各軍會合進攻毋稍遲緩紳練田端書等引眾迎萬向官效順著富明阿唐訓斌仍遵前旨飭令進圖下蔡以掣蒙城賊勢並著曾國藩檄奇周寬世毛有銘各軍乘勢進攻潁蔡一帶各路同時並進使苗逆應接不暇勦辦當易得手李世忠俟攻拔壽城後卽移軍西上直搗王蔡老巢與姚書田等練眾並周寬世等楚軍聯絡聲勢將潁蔡一帶賊氛悉行掃蕩俾苗黨退無所據該逆自不難速就殲擒李世忠頗能用命著曾格林沁等多方激勵令其益加奮勉爲國宣力該提督統兵深入並著曾國藩代籌後路布置勿令賊匪鈔襲蒙城濠外賊壘業經英翰攻克其

一若再破一二壘糧路即可通運陳國瑞亦連日猛攻轟開賊營
十餘丈斃匪百餘名勦辦甚爲得手惟蒙城待援情形十分危迫
而苗黨人數眾多悉力抗拒賊營急切難破昨覽吳棠繪呈之圖
官軍包賊營外搶築營盤僅能遏截東北兩面與陳國瑞聯絡聲
勢斷賊糧路僧格林沁見已移軍赴皖著卽馳往蒙城嚴密布置
迅解城圍以救倒懸唐訓方見已進軍蚌埠著卽將沿淮一帶賊
圩速行掃蕩進規懷遠力扼中權以斷蒙壽賊勢所有李世忠糧
餉軍火著唐訓方源源接濟其陳國瑞所部軍餉火藥仍由吳棠
隨時撥解勿令缺乏將此由去百里各諭令知之○諭張凱嵩奏
石逆餘黨分竄楚黔粵各邊界見飭追躡約會三省圍勦並潯州
逆黨紛竄橫州勦辦情形各等語李福猷本石逆黨中著名悍賊
石逆被殲之後率其餘黨分投竄擾候黔候趙轉捷靡常並擾及

粵東西各邊界若令所至蔓延日久勢成流寇轉益鴟張勦辦更
爲費手必須楚黔粵三省官軍會合兜剿就地殲除著勞崇光張
亮基憚世臨與毛鴻賓張凱嵩等嚴飭各該省帶兵文武互相聯
絡探明賊蹤前截後追務令該匪不得喘息此等亡魂紛竄之賊
尤須鄉團四面設防俾賊所至無所擄掠著官軍得以會合擊
剿乃足制其死命並著各該督撫飭各地方認真辦理其由賀縣
竄至開建之賊毛鴻賓等督飭兩粵各軍乘勢殲除該處客匪尙
多未靖毋令勾結爲患憚世臨仍飭楚邊各軍相機堵剿潯州逆
首黃二尙踞平天寨負隅死守張凱嵩卽飭劉坤一等速籌攻擣
容縣已經克復其首逆范亞音逃往大化等處保屬何州縣地方
務須趕緊嚴行按捕毋任渠魁漏網致貽後患其由潯分竄橫州
之李亞得甘太然等股並著張凱嵩飭令參將潘忠實等軍迅速

埽除漸次進圖南太等處之賊以靖邊圉橫永一帶亦與廣東欽
靈毗連總須兩省會合剿辦信宜縣城諒已收復高州餘匪辦理
如何毛鴻賓等奏報當已在途亟應乘此激勵兩省官軍將高潯
巨股一氣埽蕩其餘零匪自可乘機次第殄除也將此由六百里
各諭令知之○丁酉李鴻章奏程學啟等軍自攻克蠡口黃埭後
卽飭由許關一帶鈔襲十月初九日戎登督帶常勝軍並礮隊輪
船前進程學啟派陳有昇等營分爲兩翼自督陳忠德等由中路
進攻復派巡湖營水師由天河直逼黃巖對壘成俞卿等水師三
營均分路由黃巖繞進許關該逆連營數十座俱以悍賊踞守抗
拒程學啟派張符科等分隊左右賊營戈登督槍隊兩面環攻黃
巖升督水師連環開礮酣戰三時戈登隨隊督勇直撲立將王瓜
涇口賊營六座攻克程學啟督軍將親督勇剿賊營四座攻克各軍

直抵關口該逆仍復抵死抗拒程學啟戈登派令各軍施放洋槍
火箭轟斃悍賊無數遂將澣關賊營五座全行攻破戈登督兵駐
守程學啟卽會同克根木督帶輪船進逼十里亭賊營張行科等
踰濠攻入先克左首賊營其餘四營之賊亦卽敗遁虎邱賊營相
繼潰走沿途賊卡十數處一律埽平擒斬悍賊無數追至閩門街
口該逆自相踐踏沿途賊屍枕藉程學啟等分派水陸各營擇要
扼紮臣查澣關道通無錫援賊恃有此路得與城賊策應此次程
學啟等安速進剿分兵置守蘇城陸路盡斷城賊已孤忠侍各援
逆當亦氣奪十二日忠逆分股由無錫回援復經程學啟等擊退
李朝斌等水陸各軍是日由五龍橋進攻盤門又破賊營六座臣
擬親赴城外察看督飭圍攻又奏本年恭奉 恩綸蘇松常鎮太
四府一州分別減定漕糧江南重賦之區從此得蘇喘息永被

皇仁億萬生民同深感戴茲據蘇屬各紳士呈稱見在收復地方各業戶額收租息願以三分之一報捐軍餉另提善後撫恤經費豫備克復蘇州之用懇請派員設局勸辦等情臣查該紳士等所請報捐軍餉豫籌善後經費出於真誠所有新復各州縣地方既未能一律徵漕自應遴派妥員會同紳董察看情形分別籌辦俟將來辦有成效倣照上海見辦捐例由臣覈實彙案請獎上諭議政王軍機大臣等滄關爲閭門至無錫大道援賊麇集西路時與城賊往來策應此次經程學啟等督軍攻克蘇城陸路盡斷賊勢已孤李朝斌等復由五龍橋偪攻盤門踏平賊壘五座李鴻章見親赴婁門調度擬卽分門進攻是蘇城大有克復之機覽奏深慰廑系惟戶在忠侍各股尙踞無錫東北之茅塘橋等處雖滄關既克勢難回援而城賊既窮難保該逆不拌死回救以顧巢穴著

李鴻章一面飭令李鶴章等攔頭截擊以圖牽制一面督同程學啟等軍分攻各門使該逆兩不相顧以期名城迅復早奏膚功仍須穩慎將事謀出萬全不可稍有疏失蘇城陸路既斷若當官軍克復之際誠恐該逆渡江北竄或擾及鎮防均不可不嚴爲之備都興阿馮子材魁玉務各飭令水陸防師嚴密布置如敗匪紛竄卽行迎頭截擊力圖聚殲無任鋌走蘇郡各屬紳民呈稱收復地方各業戶願於應收一半租息內以三分之一報捐軍餉又另提善後撫恤經費豫備克復蘇城後用度具見惻忱惟地方新復民困甫蘇李鴻章惟當飭令所派委員會同該紳董體察民生困苦情形分別籌辦不得稍有抑勒以順輿情將此由六百里各諭令知之○諭富明阿奏攻剿情形添募勇丁並請催吳棠協餉各摺片富明阿一軍由渦河南北兩岸進援蒙城搶築營壘陳國瑞一

軍攻克李圩英翰一軍於城西南各路斷賊糧運該逆見我軍攻之愈力拌死抗拒夜夜併力攻城官軍於十月十五日將城河以南兩營退入城門河北兩營爲賊所踞浮橋亦爲所毀賊復增添精悍阻我進兵之路致與城中聲息不通蒙城危在呼吸亟應設法援救卽著富明阿唐訓方就見有兵力與陳國瑞等軍聯絡聲勢設法進援派兵斷賊糧道尤爲目前要著並著妥籌布置僧格林沁已由河南省城啟程著懷遵前旨迅督大軍星馳救援力解蒙城之圍以期轉危爲安捻首李大箇子項盤等見在竄往徐宿之間四出焚掠徐宿一帶爲蒙營糧運必由之路該處如被匪梗塞關繫實非淺鮮富明阿業飭姚廣武帶領馬勇四百名跟蹤追剿並著吳棠派兵夾擊妥籌兼顧迅掃賊氛以清餉道富明阿擬於宿州一帶添募勇丁一千名惟苗逆詭謀百出且與捻匪互相

句結黨與眾多該將軍在宿州等處募勇萬一苗捻各逆陰遣死黨赴募作爲內應一經墮其狡詐勢必爲該逆所乘不可不豫爲之防富明阿務當酌量情形出以慎重妥籌辦理不可稍涉大意富明阿所稱八月間由揚州啟程糧臺支發餉銀軍火等項支應亦俱無多迄今五十餘日未見續有報解見將營中所屯之米酌發接濟存米一經發完而協餉仍復不至饑軍譁潰堪虞至軍火器械等項需用尤急請飭按月撥解等語蒙軍勢形岌岌若兵糧軍火更多缺乏勢必立形決裂大局何堪設想著吳棠督飭喬松年務將每月應解富明阿營糧餉軍火器械等項按月如期撥解如再稍涉遲逾致誤戎機必惟吳棠等是問將此由六百里各諭令知之○諭富明阿等軍會攻圍蒙逆壘該逆濠深壘堅勦辦未能得手亟應厚集兵力以壯軍聲庶可相機進取該將軍所擬於

宿州添募勇丁新集之眾恐難借資得力見在直隸全境肅清山東境內餘匪該省兵力亦敷剿辦所有直東兩省從前調集添募之勇丁自應隨時遣撤劉長佑前派吳永敖赴滬添募之勇丁一千名並蔣希夷所部豫勇八百名疊經諭令撥交張之萬調遣見在蒙城攻剿喫緊亟須添兵協助著劉長佑閻敬銘查明直隸山東軍營內見在存營之勇可以遣撤者尙有若干名卽行遴委妥員帶赴蒙城交富明阿調遣並酌量籌給勇糧等項以利進行吳永敖蔣希夷所部勇丁已先後撥赴豫省並著張之萬查明如兵力可敷防剿卽於前二項勇丁內酌量分撥派員管帶赴蒙助剿該督撫等接奉此旨卽行妥籌調撥毋少遲延並一面奏聞以慰廬系聞山東有遣散之勇並未派員管帶回籍致有騷擾著閻敬銘查明如有此項勇丁迅卽派員管帶飭赴蒙城以助兵力將此

由六百里各諭令知之○諭總理各國事務衙門奏貴州教民一案接勞崇光等來函以此案已與該處教主胡縛理商酌該主教允致柏爾德密信函有可使戍邊之語惟不願田興恕再回黔省似尙知中國辦案不能違例科罪又經總理衙門與柏爾德密重加辯論將中國定例及田興恕屢逢恩詔應行減等並其罪名出入輕重必應按照定章辦理各節再三曉譬據該公使聲稱止求就近在川訊辦但田興恕並未監禁必須監禁後照中國例辦理給予照會寄知本國即可完結等語田興恕係奉旨拏問之員無論在何處查辦總應照例先行羈禁若令在外逍遙不惟無以服外國人之心卽中國亦安有此辦案之法著崇實駱秉章接奉此旨卽將田興恕查提到省羈禁迅速奏報勞崇光張亮基懷遵疊次諭旨速將此案卽在黔省秉公查辦按例定擬具奏以便總理

各國事務衙門照會駐京公使迅速了結將此由六百里各諭令知之○富明阿奏蒙城被圍實由唐訓方不能豫先籌顧苗沛霖糾黨圍蒙逆計本極狡毒而蒙邑練董李南華署知縣賀緒蕃督飭勇練堅意苦守力圖保全又有臬司馬新貽一軍六千餘人駐紮聯絡尙可支持迨進攻懷遠之軍因未先顧後路倉卒失利臨淮喫緊唐訓方札調馬新貽辦理營務處事宜並抽調王才秀兵勇一千餘名赴臨助剿另飭署廬鳳道英翰接統其軍維時正值苗逆大股趨蒙英翰雖有五千餘人而緊當賊衝軍火糧餉又俱不能應手自覺難支屢稟唐訓方請示唐訓方徑飭撤回小澗集遠離蒙城二十五里致與城內聲氣不能相聯任賊挖濠數道築壘無數乘間合圍及陳國瑞援軍到時則該逆築壘已成負固死守陳國瑞疊次進攻已傷亡千餘人臣所部旬日之間又傷亡三

百餘人急切俱未得手皆由唐訓方不能先事豫籌至今補救爲難報聞○予安徽陣亡遊擊李仕貴祭葬世職○戊戌諭議政王軍機大臣等官文嚴樹森奏毫捻竄入鄂疆經官軍剿擊遁回豫境全楚肅清一摺毫捻程大老砍等由豫入鄂圖竄漢鎮經楚軍分道扼擊退踞宋埠中館驛一帶官文等豫調周鳳山一軍扼紮黃郡舒保督率各軍力戰斬馘數千該逆受創北遁全楚肅清而張總愚一股又由唐鄧一帶窺楚鄖陽及均州光化勢甚喫重著官文等飭令派出各軍會合豫軍將程大老砍一股奮力夾擊無任再行竄擾程逆是否殲斃並著查明具奏張總愚一股由南召南侵擾及唐鄧前經諭令張之萬飭令在防將士實力堵遏並令張曜力顧西路以杜紛竄據該撫奏已派兵分扼鎮平內鄉何以此股逆匪仍復擾及鎮平內鄉鄧州足見平日所奏全是紙上空

談毫無實際張曜究竟見在何處曾否與賊接仗南召一帶團練何以不能聯絡禦賊毛昶熙係專辦團練之員亦不得置身事外著將近日賊情軍情據實陳奏捻匪假道於豫以擾楚疆久成輕車熟路中州門戶洞開以鄰爲壑毫無布置實堪痛恨著張之萬毛昶熙嚴飭張曜等會同楚軍前截後追不得以賊氛出境遂爲了事若任令程大老砍飽颺回巢張總愚竄擾秦楚必將該撫等重治其罪決不寬貸懷之愼之卽陽防務萬緊道員梁作楫一軍無論行抵何處官文等卽檄令就地駐紮兼顧卽防與歐陽正塘一軍互相策應以固邊圉勿稍大意將此由六百里各諭令知之○己亥諭內閣向例理事同知通判缺出無論內地邊地俱於保送記名之中書小京官筆帖式內由吏部帶領引見補授惟奉天府屬之昌圖廳所轄地方遼闊應否於理事通判外添設官職較

大之員以資彈壓抑或就理事通判一缺酌量增改官階及嗣後該廳員缺應如何揀員升補調補一切變通辦理之處著吏部妥議具奏○庚子諭議政王軍機大臣等馮子材奏南路逆援屬集見籌進剿情形一摺金陵官軍紮過孝陵衛屢戰皆捷乘勝攻克秣陵關等要隘南路長圍漸合鮑超一軍亦從東壩溧水轉戰而前疊經曾國藩奏到各情與本日馮子材所奏略同金陵賊勢窮蹙蘇常各逆首悉索死黨數萬盡銳下援分屯句容丹陽境內以洪逆僞令併力死守鎮防近接丹陽當上游埽蕩羣兇之時自應乘此力振軍威用資犄角惟鎮防兵力未厚而賊勢尙眾該提督等以賊情愈蹙我兵舉動尤當謀出萬全所籌甚屬周妥著卽督令派出之總兵田宗揚等將挑備各營勁旅簡齊軍實秣馬厲兵聽候進止先將沿途賊壘設法翦除分兵進紮新豐其餘各營扼

守鎮城及雲臺寶蓋諸山不得稍涉疏虞一俟鮑超之軍由溧水進攻句容卽令田宗揚等各營由新豐滾營前進規取丹陽聯絡聲勢以收夾擊之效此時金陵蘇州圍攻均可得手各軍均當穩慎以圖萬全鎮防距賊密邇尤須防賊勢窮鋌走並著馮子材等懷遵疊次諭旨與都興阿南北兩岸嚴行備禦仍隨時稟商曾國藩通籌戰守以赴事機將此由六百里諭令知之○辛丑諭議政王軍機大臣等張之萬奏皖捻由楚歸巢並遏截張總愚股匪西竄遣撤吳永赦募勇調張學醇赴豫各摺片皖捻程二老砍分股由楚回竄豫疆經光山正陽息縣汝陽等處兵圍截擊並經尹嘉賓一軍由淮店扼截敗匪全股遁出豫境該逆雖經回巢難保不糾集黨與復行竄豫著張之萬督飭在防將士嚴密扼守毋令再行竄入邊境毛昶熙見駐歸郡防剿歸陳邊境是其專責著卽督

率兵勇激勵團練進攻該逆老巢俾匪眾不得乘閒再行出巢他竄毋稍玩誤息縣餘匪尙踞正息交界之談家園一帶著張之萬卽飭李殿元王文行等軍迅速掃除張總愚股匪竄撲鎮平內鄉浙川一帶勢將擾及商雒張之萬見雖分派兵勇赴西坪荆子關舊縣等處扼紮要路惟山大林深路徑叢雜著該撫嚴飭地方文武分撥兵勇會合民團嚴密扼守飭令張曜力遏險要防其西竄並著多隆阿派撥兵勇力遏商雒毋令該匪竄入劉蓉張集馨亦當檄令毗連豫境各州縣聯絡鄉團堵截毋任與山陽一帶股匪勾合此股賊匪如不能西竄必將南趨楚境官文嚴樹森務當督率襄樊防兵實力堵遏並會合豫軍夾擊切勿稍分畛域前因蒙城兵力不敷諭令張之萬將吳永敖蔣希夷所募勇丁添員管帶赴蒙助剿茲據張之萬奏稱接劉長佑咨吳永敖所部勇丁係在

各處湊募恐難得力等語此項勇丁既毋庸留豫亦毋庸赴皖著
卽知會劉長佑檄令妥爲遣散其吳永敖一員著張之萬於其到
豫後察看如該員尙能得力卽著與續行調赴豫省之吳再升一
併畱營酌量差委蔣希夷所部勇丁仍著該撫察看分別去畱如
豫省兵力已敷分布卽著仍遵前旨將蔣希夷所部酌撥赴蒙程
大老砍有無下落前據官文等奏稱殲斃賊首程姓是否卽程逆
兄弟著卽確查具奏張之萬奏請調前任安徽按察使張學醇著
卽准其調營差委將此由六百里諭知官文多隆阿嚴樹森劉蓉
張之萬毛昶熙並傳諭張集馨知之○以英桂爲福州將軍沈桂
芬署山西巡撫

由戶部左
侍郎署

○癸卯李鴻章奏本月初二日侍逆率

黨出撲鴨城橋經李鶴章飭郭松林張樹聲周盛波等分路進攻
將賊擊退追至坊前賊營忠逆復由茅塘橋率數萬人來撲周盛

波張樹聲分軍禦之鏖戰良久郭松林攻破坊前一營周盛波擊退西路奪東亭土卡一座張樹聲擊退東路奪茅塘石卡賊股數千又由梅村繞出搶阻浮橋適譚正武等及郭松林馬隊至橋猛衝槍隊奮力排擊賊乃大敗周盛波等五營已先紮隆興橋鴨城橋兩處李鶴章又調張樹聲等營分紮中安太平西安橋芙蓉山等處並飭郭松林周盛波張樹聲等次第滾紮劉銘傳亦率銘字六營至鴨城橋會剿初十日劉銘傳郭松林分營誘敵忠逆突由東路排列大隊抗拒張樹聲督軍猛擊符信等從旁鈔入該逆大亂追至西倉我軍槍礮齊發踏毀賊營二十餘座追至茅塘橋十一日李鶴章劉銘傳復調各軍由西合攻錫城出援賊數萬分股攻我雁臺石卡當飭李正佩等分隊往堵並派周盛波兩營隔河抵敵余思樞劉啟福兩營由後截之正相持間賊忽由新塘街一

帶分路來撲我軍左右迎擊賊始敗回適程學啟等已克潯關滕嗣武等約於十二日水陸會攻連毀賊營四座斬擒無數是日侍逆仍添調護逆等股由常來援城中潮逆亦出大隊相助自東南門屯紮至新塘街縱橫十餘里李鶴章劉銘傳商令張樹聲等各營先向侍逆土城後路進紮郭松林等伏軍於土城河邊王東華率礮船會同各營擊退侍逆潮逆等亦被我軍擊敗斃賊千餘名十三日劉銘傳等乘夜三面環攻暗繞賊後燒其更樓十餘座攻賊前營悉殲其眾餘賊棄壘逃走我軍節節跟追侍逆扼踞浮橋我軍憑河開槍轟擊童邦喜等適由新塘追勦又鈔其後賊乃狂奔追近南門始各收隊李鶴章先調符信余思樞等營徑攻茅塘賊壘由西倉分路鈔入該逆初未及防我軍乘勢蹙之擒斬甚眾追至虞塘而還計忠侍兩逆大股連營數十里一律毀盡連日擒

斬薊斃溺斃賊匪逾萬踏毀大小賊壘百餘座訊據擒賊供稱護
逆遁回常州侍逆遁回宜興溧陽忠逆暫退蘇州北望亭一帶仍
欲繞由潁關背後靈巖山木瀆小路援應蘇州等語臣查官軍分
攻蘇錫以來城賊勢漸窮蹙忠侍各悍酋糾率大股回救擾我後
路冀解蘇圍經劉銘傳郭松林張樹聲周盛波等滾營偏紮晝夜
苦戰得以大挫其鋒臣見飭水陸各軍設法攻蘇並飭李鶴章劉
銘傳等乘勢進紮併圖無錫如一處得手則兩城次第可下惟將
士過勞窮寇死守仍須於奮勇中力求穩慎以策萬全 上諭議
政王軍機大臣等忠侍各悍酋糾率大股併力回援經劉銘傳等
大挫其鋒實屬奮勇出力惟將士摧堅陷陣攻勦過勞而窮寇負
隅死守且訊據賊供忠逆暫退蘇州北望亭一帶仍欲繞由潁關
背後援應蘇州是賊黨雖敗而援蘇之路未斷李鴻章亟宜乘此

兵威大振之時督飭水陸各軍併力攻克蘇城並飭李鴻章劉銘傳等乘勝進紮圍攻無錫使賊首尾不能相顧則一處得手其餘自成破竹之勢見在聲威正盛尤當謀出萬全李鴻章仍須督率各軍於奮勇之中力求穩慎迅奏膚功同膺懋賞實有厚望焉將此由六百里諭令知之○富明阿奏苗逆圍攻蒙城更添精悍阻我進路臣仍嚴飭各軍滾營進紮詹啟綸派軍前偪賊壘緊紮三營與英翰所紮之營聯爲一氣十月二十日轟退賊營一座斃賊百餘人二十三日該逆率眾撲犯官軍營壘經我軍截斃賊無數王萬清亦於北岸步步前進緊偪賊壘臣逐日選派馬隊馳赴蔡家圩一帶截賊糧運據陳國瑞咨稱十月十六日夜間親率馬步各軍進截該逆正南糧路派佐領訥穆錦等帶領馬隊接應十七日令康錦標等在南門一帶搶紮三營適僧格林沁派翼長舒

通額等帶領馬隊二千名來蒙行至陳國瑞營次陳國瑞派遊擊李坤等會合前往奪賊一營殺斃悍賊四五百名英翰亦於十八九等日在南門外搶築三營二十日又派程文炳等於附近要地紮營與陳國瑞聯絡應援姚廣武等亦率營前進臣與陳國瑞通飭各營趕修長濠以防竄逸該逆見我軍合圍斷其糧路遂連夜空濠避我槍礮以便負糧而進二十二日程文炳等力據其濠匪黨叢擁來撲陳國瑞派隊衝擊程文炳等率隊夾攻擒斬悍賊數百名前攻之劉家圩及見圍之李家圩亦均薙髮投誠二十三日侍郎國瑞統率馬隊來蒙會同臣查看情形妥籌進剿擬將蔡圩鏟除先清南路二十四日僧格林沁國瑞親率馬步各隊與臣前往蔡圩合擊斃賊甚多僧格林沁見駐葛家樓剿辦苗捻各圩肅清後路再圖進取至蒙城遠近附苗各圩經臣到蒙後前後收撫

五十餘圩已交英翰就近妥爲辦理見在圍蒙之賊及苗逆死黨知我外圍已合又聞僧格林沁已到密稟投誠者甚多臣飭令立功後方准投誠並限以五日獻出逆首必照前示重賞予以官階卽該逆等意在緩軍而我不爲所愚逆亦無能爲役矣至李世忠一軍自攻克柏家圩後於十月初八日攻克中心渡及李萬春賊圩二十餘座斃賊數千一十二十三等日疊破小古墩夏家寨等處賊圩殺賊千餘兵勇共傷一千數百名見飭進取下蔡力圖苗逆老巢以收夾擊之效又奏僧格林沁督師來蒙所有援蒙各軍一切進剿機宜及軍情奏報擬卽商飭陳國瑞等隨時咨報僧格林沁彙覈具奏以期事權歸一上諭蒙城合圍賊糧已斷僧格林沁國瑞先後到蒙軍威已振見在附逆各圩紛紛投誠實有可乘之機會著僧格林沁等督飭各軍奮力進取先解蒙城之圍

仍責令投誠各圩密圖首逆如能函首來獻餘黨自必瓦解或以賊攻賊令當前敵而以勁軍繼其後其真能出力者免罪優獎如不出力立予正法該親王等務當妥速辦理以紓朝廷南顧之憂惟苗逆設計陰狡僧格林沁等須刻刻防維不可稍涉大意李世忠屢克賊圩殺賊不少其所部傷亡亦多著僧格林沁曾國藩加以獎勵使其格外出力報效並令其進取下蔡老巢使苗逆腹背受敵以收指臂之效富明阿另片奏援蒙各軍進剿機宜咨報僧格林沁彙奏等語嗣後皖省攻剿苗捻各路兵勇及陳國瑞等軍一併統歸僧格林沁節制以一事權從此各軍有所稟承自不難迅奏膚功尅期蕞事李世忠立功圖報其心無他惟其手下人多有不安本分者恐該提督有未能查知禁止之處致爲人言所指摘近日聞有武弁黃銀懷自稱升用總兵係李世忠部將奉委到

江西省城提取餉銀迺購屋娶妻窩娼聚賭提刀逞兇被人呈控有案又有都司胡冠英徐鳳和二員赴新建屬之吳城鎮造船其文移有管帶豫勝營提督王字樣此等劣弁未知是否李世忠部下著曾國藩飭知李世忠卽將該員等撤回管束如係冒名提餉造船卽知會江西巡撫將該員拏辦以示懲儆富明阿前奏蒙城被圍實由唐訓方不能預先籌顧又將英翰一軍撤回小澗集致與城內聲氣不能相聯使該逆得以乘隙肆志至今補救爲難等語唐訓方辦理蒙城事宜是否措置乖方著僧格林沁查明具奏原片著鈔給僧格林沁閱看將此由六百里各諭令知之○諭沈葆楨奏籌防西路布置情形一摺石逆餘黨李幅猷一股被官兵擊敗回竄黔粵境內是江省西南防務可以稍鬆惟該逆奔竄靡定且永甯等縣有齋匪餘孽乘機思逞不可無得力兵勇扼要駐

紮以備不虞沈葆楨見因席寶田江是事兩軍請假休息已檄調
普承忠帶兵千人回顧吉安並饒防之韓信春一軍馳回贛州相
機迎擊布置甚爲周密著卽嚴飭該護鎮等速將齎匪餘黨搜捕
淨盡仍隨時確探李逆蹤迹如再由楚粵東竄卽激勵軍士協同
地方團練併力兜剿俾完善之區該匪無從闖入方爲妥善該撫
因西路有警不敢拘定假期見己力疾視事具見以國事爲重忠
盡可嘉所稱隨時參酌以民力補兵數之闕以吏治爲軍政之根
等語洵能洞中窾要著卽振刷精神力圖整頓務令治效蒸蒸日上
紓朝廷南顧之憂方爲不負委任另片密陳李世忠委員黃銀
懷來江索餉並造船之胡冠英等形迹均覺可疑等語本日已諭
令留國藩轉飭李世忠將黃銀懷等迅速撤回矣黃銀懷等近日
作何舉動該撫仍當密飭地方員弁認真查察毋稍大意將此由

五百里諭令知之○命荊州將軍富明阿幫辦欽差大臣僧格林沁軍務○予浙江殉難道員田祥祭葬世職○是月蠲免廣西永安等三十三州廳縣暨歸德等七土州被擾新舊額賦蠲緩廣東化州等七州縣被擾額賦緩徵山西薩拉齊廳被水新舊額賦